


全五代詩附補遺

二





全 五 代 詩

附 補 遺

(二)

李 調 元 編



全五代詩卷六

梁

韓儀

儀字羽光。萬年人。偁之兄。以翰林學士為御史中丞。梁太祖貶棣州司馬。歸為登州司戶參軍。

絕句

短行軸子付三銓。休把新銜惱必先。今日便稱前進士。好留春色與明年。

薛昭緯

昭緯河東人。唐乾寧中為禮部侍郎。梁初累貶礪州司馬卒。

據言薛保遜大中朝尤肆輕佻。因之侵侮諸叔。故自起居舍人貶洗馬而卒。其子昭緯頗

有父風。常常任祠部員外時。李系任小儀。王堯任小賓。正旦立仗班退。昭緯朗吟曰。左金烏而右玉兔。天子旌旂。堯遽請下句。昭緯應聲答曰。上李系而下王堯。小人行綴。聞者靡不洪晒。天復中自臺丞累貶登州司馬中書舍人。顏蕘當制略曰。陵轢諸父。代嗣其凶。北夢瑣言。薛公標韻詞辯宴接。莫不款曲。一日梁祖話及鷹鷂。薛公祗對盛言鷲鳥之後。梁祖欣然謂其亦曾放弄。歸館後傳語送鷄子一頭。薛生致書感謝。乃對來人戒僮僕曰。令公所賜。真須愛惜。果以紙裹安鞞袋中。來人失笑。聞於使衙。又昭緯恃才傲物。亦有父風。每入朝省。弄笏而行。旁若無人。好唱浣溪紗詞。知舉後。有一門生辭歸鄉里。臨岐獻規曰。侍郎重德。某乃受恩。爾後請不弄笏與唱浣溪紗。即其幸也。時人謂之至言。



謝銀工

一櫟氈根數十皴。盤中猶更有紅鱗。早知文字多辛苦。悔不當初學冶銀。

裴廷裕

廷裕字膺餘。昭宗時翰林學士。左散騎常侍。梁時貶湖南。

據言廷裕乾寧中在內庭。文書敏捷。號為下水船。梁太祖受禪。姚洎為學士。嘗從容上問及廷

裕行止。泊對曰。頃歲左遷。今聞旅寄衡水。上曰。頗知其人。構思甚捷。對曰。向在翰林。號為下水船。太祖應聲謂泊曰。卿便是上水船也。泊微笑。深有慙色。議者以泊為急灘頭水船也。又小歸尚書。裴起部與邠之李搏先輩舊友。搏以詩賀

廷裕曰。蜀中登第。銅梁千里。曙雲開仙筍。新從紫府來。天下也張新羽翼。世間無復舊塵埃。嘉禎果中君平卜。賀喜須斟卓氏盃。應笑戎藩刀筆吏。至今泥滓曝魚鰓。既而復以二十八字謔之曰。曾隨風水化凡鱗。安上門前一字新。聞道蜀江

風景好。不知何似杏園春。裴有六韻答云云。

蜀中登第答李搏六韻

何勞問我成都事。亦報君知便納降。蜀柳籠堤煙轟轟。海棠當戶燕雙雙。富春不並窮師子。濯錦全勝旱曲江。高捲絳紗楊氏宅。半垂紅袖薛濤牕。浣花泛鷁詩千首。靜衆尋梅酒百缸。若說弦歌與風景。主人兼是碧油幢。

偶題

微雨微風寒食節。半開半合木蘭花。看花倚柱終朝立。卻似淒淒不在家。



聶夷中

夷中字坦之。河東人。咸通十二年登進士第。官華陰尉。梁初卒。

王漁洋五代詩話。夷中少貧苦。精於古體。有公子家詩。田家詩。言近意遠。合三

百篇之旨。唐音戊籤。夷中詩載史傳文苑英華洪氏絕句者二十七首。載郭茂倩樂府互見孟東野集者一首。皆為夷中原集之舊。趙元度藏有李孔章本多七首。今校定雜怨二首。即孟東野之征婦怨。鋤田當日午一絕。乃李紳詩。並刪餘

四首別為

錄存之。

空城雀

一雀入官倉。所食能損幾。所處往復頻。官倉乃害爾。魚網不在天。鳥網不張水。飲啄要自然。何必空城裏。

短歌行

八月木陰薄。十葉三墮枝。人生過五十。亦已同此時。朝出東郭門。嘉樹鬱參差。暮出西郭門。原草已離披。南鄰好臺榭。北鄰善歌吹。榮華忽銷散。四顧令人悲。生死與榮辱。四者乃常期。古人恥其名。沒世無人知。無言鬢似霜。勿謂髮如絲。耆年無一善。何殊食乳兒。

公子行二首

漢代多豪族。恩深益驕逸。走馬踏殺人。街吏不敢詰。紅樓宴青春。數里望雲蔚。金缸焰勝晝。不畏落暉疾。美人盡如月。南威莫能正。芙蓉自天來。不向水中出。飛瓊奏雲和。碧簫吹鳳質。唯恨魯陽死。無人駐白日。



花樹出牆頭。花裏誰家樓。一行書不讀。身封萬戶侯。美人樓上歌。不見古涼州。

飲酒樂

日月似有事。一夜行一周。草木猶須老。人生得無愁。一飲解百結。再飲破百憂。白髮欺賤貧。不入醉人頭。我願西江水。盡向杯中流。安得阮步兵。同入醉鄉游。

勸酒二首

白日無定影。清江無定波。人無百年壽。百年復如何。堂上陳美酒。堂下列笙歌。與君入醉鄉。醉鄉樂天和。歲歲松柏茂。日日邱陵多。君看終南山。萬古青峨峨。灞上送行客。聽唱行客歌。適來橋下水。已作渭川波。人間榮樂少。四海別離多。但恐別離淚。自成苦水河。勸爾一杯酒。所贈無餘多。

田家

二月賣新絲。五月糶新穀。醫得眼前瘡。剜卻心頭肉。我願君王心。化作光明燭。不照綺羅筵。只照逃亡屋。大垂手。

金刀剪輕雲。盤用黃金鏤。裝束趙飛燕。數來掌上舞。舞罷飛燕死。片片隨風去。

胡無人行

男兒徇大義。立節不沽名。腰間懸陸離。大歌胡無行。不讀戰國書。不覽黃石經。醉臥咸陽樓。夢入受降城。



更願生羽翼。飛身入青冥。請攜天子劍。祈下旄頭星。自然胡無人。雖有無戰爭。悠哉典屬國。驅羊老一生。

雜興

兩葉能蔽目。雙豆能塞聰。理身不知道。將爲天地聾。擾擾造化內。茫茫天地中。苟或無所願。毛髮亦不容。

古興

片玉一塵輕。粒粟邱山重。唐虞貴民食。祇是勤播種。前聖後聖同。今人古人共。一歲如苦饑。金玉何所用。

秋夕

日往無復見。秋堂暮仍學。元髮不知白。曉入寒銅覺。爲材未辭樹。有玉猶在璞。誰把碧桐枝。刻作雲門樂。

訪嵩陽道士不遇

先生五嶽遊。文焰滅金鼎。月下鶴過時。人間空落影。常言一粒藥。不隨死生境。何當列禦寇。去問仙人請。

題賈氏林泉

市朝束名利。林泉繫清通。豈知黃塵內。迴有白雲蹤。輕流逗密篠。直榦入寬空。高吟五君咏。疑對九華峯。我知種竹心。欲扇清涼風。我知決泉意。欲明濟物功。有琴不張絃。衆星列梧桐。須知淡泊聽。聲在無聲中。地非樵者路。武陵又何逢。祇慮迷所歸。池上日西東。

早發鄴北經古城

微月東南明。雙牛耕古城。但耕古城地。不知古城名。當昔置此城。豈料今日耕。蔓草已離披。狐兔何縱橫。



秋雲零落散。秋風蕭條生。對古良可嘆。念今轉傷情。古人已冥冥。今人又營營。不知馬蹄下。誰家舊臺亭。

燕臺二首

燕臺累黃金。上欲招儒雅。貴得賢士來。更下於隗者。自然樂毅徒。趨風走天下。何必馳鳳書。旁求向林野。燕臺高百尺。燕滅臺亦平。一種是亡國。猶得禮賢名。何似章華畔。空餘禾黍生。

過比干墓

殷辛帝天下。厭爲天下尊。乾綱旣一斷。賢愚無二門。佞是福身本。忠作喪己源。餓虎不食子。人無骨肉恩。日影不入地。下埋冤死魂。腐骨不爲土。應作石木根。余來過此鄉。下馬弔此墳。靜念君臣間。有道誰敢論。

贈農

勸爾勤耕田。盈爾倉中粟。勸爾無伐桑。減爾身上服。清霜一委地。萬草色不綠。狂風一飄林。萬葉不着木。青春如不耕。何以自拘束。

客有追嘆後時者作詩勉之

後達多晚榮。速得多疾傾。君看構大廈。何曾一日成。在煖須在桑。在飽須在耕。君子貴宏道。道宏無不亨。太陽垂好光。毛髮悉見形。我亦二十年。直似戴盆行。荆山產美玉。石石皆堅貞。未必盡有玉。玉且間石生。精衛一微物。猶恐填海平。

住京寄同志



在京如在道。日日先雞起。不離十二街。日行一百里。役役大塊土。周朝復秦市。貴賤與賢愚。古今同一軌。白兔落天西。赤鷄飛海底。一日復一日。日日復終始。自嫌性如石。不達榮辱理。試問九十翁。吾今尙如此。

送友人歸江南

皇州五更鼓。月落西南維。此時有行客。別我孤舟歸。上國身無主。下第誠可悲。

哭劉駕博士

出門四顧望。此日何徘徊。終南舊山色。夫子安在哉。君詩如門戶。夕閉晝還開。君名如四時。冬盡夏復來。原野多邱陵。纍纍如高臺。君墳雖數尺。誰與夫子偕。

長安道

此地無駐馬。夜中猶走輪。所以路傍草。少於衣上塵。

古別離

欲別牽郎衣。問郎游何處。不恨歸日遲。莫向臨邛去。

游子吟

萱草生堂堦。游子行天涯。慈親倚堂門。不見萱草花。

烏夜啼

衆鳥各歸枝。烏烏爾不棲。還應知妾恨。故向綠窗啼。



起夜來

念遠心如燒。不覺中夜起。桃花帶露泛。立在月明裏。

公子家

種花滿西園。花發青樓道。花下一禾生。去之為惡草。

田家

父耕原上田。子劬山下荒。六月禾未秀。官家已修倉。

雜怨

良人昨日去。明月又不圓。別時各有淚。零落青樓前。

錢珣

珣字瑞文。徽之子。起之孫。善文詞。官知制誥。進中書舍人。梁開平初。貶撫州司馬卒。有舟中集。

十國春秋註。梁開平元年。錢吳越王

莊穆夫人進封晉國制。錢珣筆也。

客舍寓懷

灑灑灘聲晚。霽時客亭風。袖半披垂。野雲行止誰相待。明月襟懷祗自知。無伴偶吟溪上路。有花偷笑臘前枝。牽情景物潛惆悵。忽似傷春遠別離。



同程九早入中書

誤入祖起集

漢家賢相重英奇。蟠木何材也見知。不意雲霄能自致。空驚鸛鷺忽相隨。臘雪初明柏子殿。春光欲上萬年枝。獨慚皇鑒明如日。未厭春光向玉墀。

江行無題一百首

舊作翔祖起詩。今考詩繫遷謫途中雜詠。起無謫宦事。而聲調更不類。翔自中書謫撫州。其舟中集序見文苑英華者云。秋八月。從襄陽浮江而行。詩中潤色非東里。官曹更建章之詠。中書去指

龍沙路。及身到章江日之詠。謫撫州所入峴山。沔。武昌。匡廬。鄱湖。潯陽諸地名之詠。襄陽而下之經途。皆一一脗合。而好日當秋半。與九日自佳節。扁舟無一杯等句。尤秋八月啓行之左驗。其為翔詩無疑也。蔡寬夫詩話云。江行百首。錢蒙仲得之他本。因以傳世。元非起集之舊。宋人語更可據。今直改入錢翊集中。庶往武虛名無奪。克繩後美云爾。

傾酒向漣漪。乘流欲去時。寸心同尺璧。投此報馮夷。

江曲全縈楚。雲飛半自秦。峴山回首望。如別故鄉人。

往年屢登峴亭

浦煙含夜色。冷日轉秋旻。自有沈碑在。清光不照人。楚岸雲空合。楚城人不來。祇今誰善舞。莫恨廢章臺。行背青山郭。吟當白露秋。風流無屈宋。空詠古荊州。晚來漁父喜。網重欲收遲。恐有長江使。金錢願贖龜。



去指龍沙路。徒懸象闕心。夜涼無遠夢。不爲偶聞砧。  
霧雲疎有葉。雨浪細無花。穩放扁舟去。江天自有涯。  
好日當秋半。層波動旅腸。已行千里外。誰與其秋光。  
潤色非東里。官曹更建章。宦遊難自定。來喚櫂船郎。  
夜江清未曉。徒惜月光沈。不是因行樂。堪傷老大心。  
翳日多喬木。維舟取束薪。靜聽江叟語。盡是厭兵人。  
箭漏日初短。汀煙草未衰。雨餘雖更綠。不是採蘋時。  
山水夜來漲。喜魚跳滿江。岸沙平欲盡。垂蓼入船窗。  
渚邊新雁下。舟上獨淒涼。俱是南來客。憐君綴一行。  
雲密連江暗。風斜著物鳴。一杯真戰將。笑爾作愁兵。  
柳拂斜開路。籬邊數戶村。可能還有意。不掩向江門。  
不識相如渴。徒吟子美詩。江清惟獨看。心外更誰知。  
牽路沿江狹。沙崩岸不平。盡知行處險。誰肯載時輕。  
憔悴異靈均。非讒作逐臣。如逢漁父問。未是獨醒人。

此指杜老酒渴愛江清句也。起與杜同時。何至遽用其語。翻案益信爲珣詩矣。



水含秋夜靜。雲帶夕陽高。詩癖非吾病。何妨吮短毫。  
帶舟維古岸。還似阻西陵。箕伯無多怒。回頭詎不能。  
秋雲久無雨。江燕社猶飛。卻笑舟中客。今年未得歸。  
帆翅初張處。雲鵬怒翼同。莫愁千里路。自有到來風。  
佳節雖逢菊。浮生正似萍。故山何處望。荒岸小長亭。  
月下江流靜。村荒人語稀。鷺鷥雖有伴。仍共影雙飛。  
斗轉月未落。舟行夜已深。有村知不遠。風便數聲砧。  
棹驚沙鳥迅。飛濺夕陽波。不顧魚多處。應防一目羅。  
行到楚江岸。蒼茫人正迷。祇如秦塞遠。格磔鷓鴣啼。  
漸覺江天遠。難逢故國書。可能無往事。空食鼎中魚。  
岸草連荒色。村聲樂稔年。晚晴貪穫稻。閒卻採菱船。  
灘淺多遊鷺。江清易見魚。恠來吟未足。秋物欠紅蕖。  
蛩響依沙草。螢飛透水煙。夜涼誰詠史。空泊運租船。  
睡穩葉舟輕。風微浪不驚人。居蘆葦岸。終夜動秋聲。  
自念平生意。曾期一郡符。可知因謫宦。斑鬢入江湖。



水天涼夜月。不是少清光。好景隨人物。秦淮憶建康。  
古來多思客。搖落恨江潭。今日秋風至。蕭疏過河南。  
映竹疑村好。穿蘆覺渚幽。漸安無曠土。薑芋當農收。  
煙渚復烟渚。畫屏休畫屏。引愁天未去。數點暮山青。  
秋風動客心。寂寂不成吟。飛上危檣立。鶯啼報好音。  
見底高秋水。開懷萬里天。旅吟還有伴。沙柳數枝蟬。  
九日自佳節。扁舟無一杯。曹園舊罇酒。戲馬憶高臺。  
兵火有餘燼。貧村纔數家。無人爭曉渡。殘月下寒沙。  
渚禽菱芡足。不向稻梁爭。靜宿涼灣月。應無失侶聲。  
輕雲未撲霜。樹杪橘初黃。行是知名物。過風過水香。  
土曠深耕少。江平遠釣多。平生皆棄本。金革竟如何。  
海月非常物。等閒不可尋。披沙應有地。淺處定無金。  
風晚冷颼颼。蘆花已白頭。舊來紅葉寺。堪憶玉京秋。  
渺渺望天涯。清漣浸赤霞。難逢星漢使。烏鵲日乘槎。  
風好來無陣。雲開去有蹤。釣歌無遠近。應喜罷艨艟。



吳疆連楚甸。楚俗異吳鄉。謾把罇中物。無人啄蟹黃。  
岸綠野烟遠。江紅斜照微。撐開小漁艇。應到月明歸。  
雨餘江始漲。漾漾見流薪。曾嘆河中木。斯言憶古人。  
垂露晚猶濃。清風不易逢。涉江雖已晚。高樹搴芙蓉。  
乘舟維夏口。煙野獨行時。不見頭陀寺。空懷幼婦碑。  
晚泊武昌岸。津亭疎柳風。數株曾手植。好事憶陶公。  
舟航依浦定。星斗滿江寒。若比陰霾日。何妨夜未闌。  
近戍離金落。孤岑望火門。惟將知命意。瀟灑向乾坤。  
叢菊生隄上。此花長後時。有人還採掇。何必在春期。  
景夕殘霞落。秋寒細雨晴。短纓何用濯。舟在月中行。  
堤壞漏江水。地坳成野塘。晚荷人不折。留取作秋香。  
左宦終何路。攄懷亦自寬。褻牋嘲白鷺。無意喻臯鸞。  
樓空人不歸。雲白去時衣。黃鶴無心下。長應笑令威。  
白帝朝驚浪。陽臺暮映雲。等閒生險易。世路祗如君。



櫓慢生輕浪。帆虛帶白雲。客船雖狹小。容得瘦將軍。  
靜看秋江水。風微浪漸平。人間馳競處。塵土自波成。  
風借帆方疾。風回棹卻遲。較量人世事。不校一毫釐。  
咫尺愁風雨。匡廬不可登。祗疑雲霧窟。猶有六朝僧。  
江草何多思。冬青尙滿洲。誰能驚鵬鳥。作賦爲沙鷗。  
幸有煙波興。寧辭筆硯勞。緣情無怨刺。卻似反離騷。  
沙上獨行時。吟高到楚詞。難將垂岸蓼。盈把當江籬。  
秋寒鷹隼健。逐雀下雲空。知是江湖客。無心擊塞鴻。  
幽懷念煙水。長恨隔龍沙。今日滕王閣。分明見落霞。  
江流何渺渺。懷古獨依依。漁父非賢者。蘆中但有磯。  
風雨正甘寢。雲霓忽曉晴。放歌雖自遣。一歲又崢嶸。  
幽思正遲遲。沙邊濯弄時。自憐非博物。猶未識鳧葵。  
曾有煙波客。能歌西塞山。落花惟待月。一釣紫菱灣。  
千頃水紋細。一峯嵐影孤。君山寒樹綠。曾過洞庭湖。

晉冠軍將軍柳遐免官。桓溫怪其瘦。答云。不能不恨于破甑。用此聊自諱耳。亦以郡司馬掌武得比將軍也。



光闊重湖水低斜。遠雁行。未曾無興詠。多謝沈東陽。  
晚菊繞江壘。忽如開古屏。莫言時節過。白日有餘馨。  
日落長亭晚。山門步障青。可憐無酒分。處處有旗亭。  
遠岸無行樹。經霜有伴紅。停船搜好句。題葉贈江楓。  
身世比行舟。無風暫亦休。敢言終破浪。惟願穩乘流。  
數畝蒼苔石。煙濛鶴卵洲。定因詞客遇。名字始風流。  
興閒停桂楫。路好過松門。不負佳山水。還開酒一樽。  
短楫休敲桂。孤根自駐萍。自憐非劍氣。空向斗牛星。  
高浪如銀屋。江風一發時。筆端降太白。才大語終奇。  
細竹漁家路。晴暘看結習。喜來邀客坐。分與折腰菱。  
平湖五百里。江水想通波。不奈扁舟去。其如決計何。  
數逢雲斷處。去岸映高山。身到章江日。應猶未得閒。  
一灣斜照水。三板順風船。未敢相邀釣。勞生只自憐。  
江雨正霏微。江村晚渡稀。何曾妨釣艇。更待得魚歸。

有降太白語。又知非起詩矣。



新野舊樓名。潯陽勝賞情。照人長一色。江月共淒清。  
願飲西江水。那吟北渚愁。莫教留滯跡。違比蔡昭侯。  
湖口分江水。東流獨有情。常時好風物。誰伴謝宣城。  
潯陽江畔菊。應似古來秋。爲問幽棲客。吟時得酒不。  
高峯有佳號。千尺倚寒風。若使爐煙在。猶應爲上公。  
萬木已清霜。江邊村事忙。故溪黃稻熟。一夜寢中香。  
楚水苦縈回。征帆落又開。可緣非直路。卻有好風來。  
遠謫歲時宴。暮江風雨寒。仍愁繫舟處。驚夢近長灘。

送王郎中

惜別遠相送。卻成惆悵多。獨歸回首處。爭那暮山何。

春恨三首

負罪將軍在北朝。秦淮芳草綠迢迢。高臺愛妾魂銷盡。始得邱遲爲一招。  
久戍臨洮報未歸。篋香銷盡別時衣。身輕願比蘭塘蝶。萬里還尋塞草飛。  
永巷頻聞小苑遊。舊恩如淚亦難收。君前願報新顏色。團扇須防白露秋。

蜀國偶題



忽憶明皇西幸時。暗傷潛恨竟誰知。佩蘭應語宮臣道。莫向金盤進荔枝。

未展芭蕉

冷燭無煙綠蠟乾。芳心猶卷怯春寒。一緘書札藏何事。會被東風暗拆看。

劉象

象京兆人。天復元年登第。梁初卒。

早春池亭獨游三首

春意送殘臘。春晴融小洲。蒲茸纔簇岸。柳頰已遮樓。便有杯觴興。可攄羈旅愁。鳧鷖亦相狎。盡日戲清流。清流環綠篠。清景媚虹橋。鶯刷初遷羽。莎拳擬拆苗。細沙攞暖岸。淑景動和飈。倍憶同袍侶。相歡倒一瓢。一瓢歡自足。一日興偏多。幽意人先賞。疎叢蝶未過。知音新句苦。窺沼醉顏酡。萬慮從相擬。今朝欲奈何。

鷺鷥

潔白孤高生不同。頂絲清軟冷搖風。窺魚翹立荷香裏。慕侶低翻柳影中。幾日下巢辭紫閣。多時凝日向晴空。摩霄志在潛修羽。會接鸞凰別葦叢。

春夜二首

幾處兵戈阻路歧。憶山心切與山違。時難何處披懷抱。日日斜空醉歸。一別杜陵歸未期。祇憑魂夢接親知。近來欲睡兼難睡。夜夜夜深聞子規。



曉登迎春閣

未櫛憑欄眺錦城。煙籠萬井二江明。香風滿閣花盈戶。樹樹樹梢啼曉鶯。

詠仙掌

萬古亭亭倚碧霄。不成擎亦不成招。何如掬取天池水。灑向人間救旱苗。

鄴中感舊

頃年曾住此中來。今日重遊事可哀。憶得幾家歡宴處。家家家業盡成灰。

白髭

到處逢人求至藥。幾回染了又成絲。素絲易染髭難染。墨翟當時合泣髭。

胡駢

駢唐末人。梁初不仕。

經費拾遺舊隱

林下茅齋已半傾。九華幽徑少人行。不將冠劍為榮事。只向煙蘿寄此生。松竹漸荒池上色。琴書徒立世間名。白楊風起秋山暮。時復哀猿啼一聲。

李巨川

巨川字下己。姑臧人。佐興元。楊守亮幕。守亮敗。為華帥韓建所擒。建重其才。奏令掌書奏。乾寧



中駕幸三峯。巨川自使下侍御史。拜工部郎中。稍遷考功郎中。諫議大夫。上返正。轉假禮部尙書。充黃州節度判官。天祐初。大駕幸岐。梁太祖自東平擁師迎駕。至三峯。單騎出降。旣而素忌巨川多謀。遣人害之。

一峯兼助  
捧持之力。

遠意聯句

清晝 疾失姓 澄失姓 嚴伯均 李巨川

家在炎州往朔方。疾 豈知于闐望瀟湘。澄 曾經隴底復遼陽。巨川 更憶東去採扶桑。晝 植客三千路未

央。均 燭龍之地日無光。疾 將遊莽蒼窮大荒。晝 車轍馬足逐周王。均



...

...

...

...

...

...

...

...

...

...

...

...

...

...

...



全五代詩卷七

梁

王穀

穀字虛中宜春人乾寧五年進士第入梁官尚書郎致仕

唐音戊籤紀事穀始與崔元同在庠序相善將赴舉元餞之有日者在坐曰待此郎為相乃登

第後二十年允為相穀遂登第通志略稱其入梁未如何據調元按江西通志王穀北漢進士亦未考

吹笙引

媧皇遺音寄玉笙。雙成傳得河淒清。丹穴嬌雛七十隻。一時飛上秋天鳴。水泉迸瀉急相續。一束宮商裂寒玉。旖旎香風繞指生。千聲妙盡神仙曲。曲終滿席悄無語。巫山冷碧愁雲雨。

鴻門讌

寰海沸兮爭戰苦。風雲愁兮會龍虎。四百年漢欲開基。項莊一劍何虛舞。殊不知人心去暴秦。天意歸明主。項王足底踏漢土。席上相看渾未悟。

玉樹曲

陳宮內宴明朝日。玉樹新粧逞嬌逸。三閣霞明天上開。靈巖振攝神仙出。天花數朵風吹綻。對壁輕盈瑞



香散金管紅絃旖旎隨。霓旌玉佩參差轉。璧月夜滿樓風輕。蓮舌泠泠詞調新。當行狎客盡居祿。直諫犯顏無一人。歌舞未終樂未闋。晉王劍上粘腥血。君臣猶在醉鄉中。一面已無陳日月。聖唐御宇三百祀。濮上桑間宜禁止。請停此曲歸正聲。願將雅樂調元氣。

紀事載未及第時。輕忽被人毆擊。揚聲曰。莫無禮。吾便是。君臣猶在醉鄉中。一面已無陳日月。毆者斂衽。慚謝而退。

苦熱行

祝融南來鞭火龍。火旗焰焰燒天紅。日輪當午凝不去。萬國如在紅爐中。五嶽翠乾雲彩滅。陽侯海底愁波竭。何當一夕金風發。爲我掃卻天下熱。

暑日題道邊樹

火輪迸焰燒長空。浮埃撲面愁朦朧。羸童走馬喘不進。忽逢碧樹含清風。清風留我移時住。滿地濃陰懶前去。卻歎人無及物功。不似團圓道邊樹。

贈蒼溪王明府有文在手曰長生

執手長生在人皆號地仙。水雲真遂性。龜鶴足齊年。但以酒養氣。何言命在天。況無婚嫁累。應拍尙平肩。

逢道者神和子

珍重神和子。聞名五十年。童顏終不改。綠髮尙依然。酒裏消閒日。人間作散仙。長生如可慕。相逐隱林泉。

送友人歸閩



東南歸思切。把酒且留連。再會知何處。相看共黯然。猿啼梨嶺路。月白建溪船。莫戀家鄉住。酬身在少年。  
春草碧色  
習習東風扇。萋萋草色新。淺深千里碧。高下一時春。嫩葉舒煙際。微香動水濱。金塘明夕照。輦路惹芳塵。  
造化功何廣。陽和力自均。今當發生日。瀝懇祝良辰。

夢仙謠三首

前程漸覺風光好。琪花片片粘瑤草。有人遺我五色丹。一粒吞之後天老。  
青童遞酒金觴疾。列坐紅霞神氣逸。笑說留連數日間。已是人間一千日。  
瑤臺絳節遊皆遍。異果奇花香撲面。松清夢覺卻神清。殘月林前三兩片。

後魏行

力微皇帝謗天嗣。太武凶殘人所畏。一朝羯獠飛上天。子孫盡作河魚餌。

秋

蟬噪古槐疏葉下。樹銜斜日映孤城。欲知潘鬢愁多少。一夜新添白數莖。

燕

海燕雙飛意若何。曲梁嘔噉語聲多。茅檐不必嫌卑陋。猶勝吳宮燕爾窠。

王 渙



渙字羣吉。大順二年登第。出孫偃門下。梁初官考功員外郎。

宋詩紀事。渙九十九歲入宋爲睢陽九老圖。

悼亡

春來得病夏來加。深掩粧窗臥碧紗。爲怯暗藏秦女扇。怕驚愁度阿香車。腰肢暗想風欺柳。粉態難忘露洗花。今日青門葬君處。亂蟬衰草夕陽斜。

惆悵詩十二首

八蠶薄絮鴛央綺。半夜佳期並枕眠。鐘動紅娘喚歸去。對人勻淚拾金鈿。  
李夫人病已經秋。漢武看來不舉頭。得所濃華銷歇盡。楚魂湘血一生休。  
謝家池館花籠月。蕭寺房廊竹颭風。夜半酒醒憑檻立。所思多在別離中。  
隋師戰艦欲亡陳。國破應難保此身。訣別徐郎淚如雨。鏡鸞分後屬何人。  
七夕瓊筵隨事陳。兼花連蒂共傷神。蜀王殿裏三更月。不見驪山私語人。  
夜寒春病不勝懷。玉瘦花啼萬事乖。薄倖檀郎斷芳信。驚嗟猶夢合歡鞋。  
嗚咽離聲管吹秋。妾身今日爲君休。齊奴不說平生事。忍看花枝謝玉樓。  
青絲一綰墮雲鬢。金剪刀鳴不忍看。持謝君王寄幽怨。可能從此住人間。  
陳宮興廢事難期。三閣空餘綠草基。狎客淪亡麗華死。他年江令獨來時。



晨肇重來路已迷。碧桃花謝武陵溪。仙山日斷無尋處。流水潺湲日漸西。  
少卿降北子卿還。朔野離觴慘別顏。卻到茂陵惟一慟。節毛零落鬢毛斑。  
夢裏分明入漢宮。覺來燈背錦屏空。紫臺月落關山曉。腸斷君恩信畫工。

王周

周梁貞明間人。登進士第。曾官巴蜀。

唐音戊籤。周詩唐宋藝文志並無。惟文獻通考載入唐人集目中。今考峽船詩序內引陸魯望茶具詩。其人蓋在魯望之後。而詩題紀年有戊寅己

卯兩歲。近則梁之貞明。遠則宋之太平興國。而自注地名又有漢陽軍興國軍。爲宋郡號。周殆爲宋人無疑。以前人收入唐人內。不敢刪去。姑列于梁之貞明。示存其舊也。

### 誌峽船具詩并序

峽山之船與下之船。大抵觀浮葉而爲之。其狀一也。執而爲用者。或狀殊而用一。或狀同而名異。皆有謂也。下之船有檣有五兩有帆。所以使風也。尾有柂。傍有棚。上者以其山曲水急。下有石皆不可用也。狀直如艫。前後各一者謂之梢。船之斜正欹側。爲船之司命者。梢類柂。其狀殊。而船之便於事者。悉不如梢。作梢詩。擣槳撓棹拔。使其進而無退。利涉川澤。爲船之陳力者。艫幾槳類。其狀同而異名也。在船有力。悉不如艫。作艫詩。峽水湍峻。激石忽發者之潰。洄洑而漩漩者謂之腦。岸石壁立。潰之忽作。篙力難制。以其木之堅韌。竿直載其首。以竹納護之者謂之戩。竹爲總而勾其戩者謂之納。爲船之良輔者。戩與篙狀殊而用一也。在船獨出。悉不如戩。作戩詩。崖石如齒。非麻稟紉繩之爲前牽。取竹之筋者破而用稟。爲勒以纜之。以備其牽者謂之百丈。繫其船首者謂之陽紐。牽之者繫鼓以號令之。人聲灘亂。無以相接。所以節動止進退。牽之防礙者謂之下緯。濟其不通。爲船之先進者。稟與竹狀殊而用一也。在船先容。悉不如百丈。作百丈詩。噫。古人觀



物因事為誌者甚多也。予祇命憲局浚泝巴寶，抵瞿塘，耳目熟于長年三老輩矣。船具之於船有力者，作詩以稱之。庶幾魯望茶經者也。俾系其末詩云。

梢

制之居首尾，俾之辨斜正。首動尾聿隨，斜取正為定。有如提吏筆，有如執時柄。有如秉師律，有如宣命令。守彼方與直，得其剛且勁。既能濟險艱，何畏涉遼夙。招招俾作主，汎汎實司命。風鳥愧斟酌，畫鷁空輝映。古人存豐規，猗歟聊引證。

艣

用之大曰艣，冠乎小者楫。通津既能濟，巨浸即橫涉。身之使者頰，虎之拏者爪。魚之撥者鬣，弩之進者筈。此實為相須，相須航一葉。

戣

箭飛峽中水，鋸立峽中石。峽與水為隘，水與峽相擊。潰為生險艱，聲發甚霹靂。三老航一葉，百丈空千尺。蒼黃徒爾為，倏忽何可測。篙之小難制，戣之獨有力。猗嗟戣之為，彬彬堅且直。有如用武人，森森轟戈戟。有如敢言士，落落吐胸臆。拯危居坦夷，濟險免兢惕。誌彼哲匠心，俾其求者識。

百丈

少嘗侍先君，餘閒誦白氏。始得入峽詩，深味作詩旨。云有萬仞山，云有千丈水。自念坎壈時，尤多兢慎理。



山東峽如口。水漱石如齒。孤舟行其中。薄水猶坦履。孱顏屹焉立。洶湧勃然起。百丈爲前牽。萬險卽平砥。破之以篋管。續之以麻紬。礪之堅以節。引之直如矢。杼軸連半空。長短隨兩涘。鐵鎖枉馳名。錦纜謾稱美。長一豈能繫。朽索何足擬。苟非綵之爲。胡可力行止。

自喻

予念天之生。生本空疎器。五歲稟慈訓。憤悱讀書志。七歲辨聲律。勤苦會詩賦。九歲執公卷。倜儻干名意。乞薦鄉老書。幸會春官試。折桂愧巍峨。依蓮何氣味。性拙絕不佞。才短無餘地。前年會知己。薦章實非據。寧見民說平。空荷君恩寄。瞿唐抵巴渝。往來召攬轡。孤舟一水中。艱險實可畏。羣操百丈牽。臨難無苟避。潰向江底發。水在石中沸。槌鼓稱打寬。擊紉呼下緯。善惡胡可分。死生何足諱。騎衡與垂堂。非不知前喻。臨淵與履冰。非不知深慮。我今縻縉紳。善地誰人致。城狐與社鼠。巧佞誰從庇。奴顏與婢膝。醜直誰從媚。妻兒負限越。容顏幾憔悴。致身霄漢人。嗚噓盡賢智。

齒落詞

己卯至庚辰。仲夏晦之暮。吾齒右排上。一齒脫而去。呼吸缺吾防。咀嚼欠吾助。年籥昔不返。日馭走爲蠹。脣亡得無寒。舌在從何訴。輔車宜長依。髮膚可增懼。不須考前古。聊且爲近喻。有如雲中雨。雨散絕回顧。有如枝上葉。葉脫難再附。白髮非獨愁。紅顏豈私駐。何必鬱九回。何必牽百慮。開尊復開懷。引筆作長句。

贈怵師



水中有片月。照耀嬋娟姿。庭前有孤柏。竦秀歲寒期。堅然物莫遷。寂焉心為師。聲發響必答。形存影即隨。雪花安結子。雪葉寧附枝。蘭死不改香。井寒豈生澌。晨鑑烟裊裊。病髮霜絲絲。丈室冰凜冽。一衲雲離披。顧此名利場。得不慙冠綬。

金盤草

生寧江巫山  
南陵林木中

今春從南陵。得草名金盤。金盤有仁性。生在林一端。根節歲一節。

其根一年生一節。人採而服。可解毒也。

食之甘而酸。風俗競

採掇。俾人防急難。巴中地虺毒。解的如走丸。巨葉展六出。軟幹分長竿。搖搖綠玉活。裊裊香荷寒。世云暑

酷月。鬱有神物看。

夏中採之。則必有巨蛇。衝足。人即難採。

天之產於此。意欲生民安。今之為政者。何不反此觀。知彼苛且猛。慎

勿虐而殘。一物苟失所。萬金惟可歎。莫並蒿與萊。豈羨芝及蘭。勤渠護根本。栽植當庭欄。寄言好生者。休說神仙丹。

巫廟

巴水走若箭。峽山開如屏。洶湧正練白。崑崙濃藍青。崖空蓄雲雨。灘惡驚雷霆。神仙宅幽邃。廟貌橫杳冥。隱約可一夢。縹緲餘千齡。名利有所役。舟楫無暫停。窳窳垂盼蠻。祠禱希安寧。鴟鴞爾何物。飛飛來廟庭。紛紛颺寥泬。遠近隨虛舲。鐵石礪觜爪。金碧輝光翎。翔集託陰險。鵠啄貪羶腥。日既恃威福。歲久為精靈。



依草無附木。誣詭殊不經。城狐與社鼠。瑣細何足聽。況乎人假人。心闊吞滄溟。

泊姑熟口

杳杳金陵路。難禁欲斷魂。雨晴山有態。風晚水無痕。遠色千檣岸。愁聲一笛村。如何遣懷抱。詩畢自開尊。

道院

白日人稀到。簾垂道院深。雨苔生古壁。雪雀聚寒林。忘慮憑三樂。消閑信五禽。誰知是官府。煙縷滿鑪沈。

公居

公居門館靜。旅客萬州城。山共秋煙紫。霜并夜月清。無愁千酒律。有句入詩評。何必須林下。方馳吏隱名。

富池口

扁舟閑引望。望極更盤桓。山密礙江曲。雨多饒地寒。短莎烟苒苒。驚浪雪漫漫。難寫愁何限。鄉關在一端。

題廳壁

永日無他念。孤清吏隱心。竹聲并雪碎。溪色共煙深。數息閑凭几。緣情默寄琴。誰知同寂寞。相與結知音。

過武寧縣

行過武寧縣。初晴物景和。岸回驚水急。山淺見天多。細草濃藍潑。輕烟正練拖。晚來何處宿。一笛起漁歌。

西小晚景

公局長清淡。池亭晚景中。蔗竿開倚碧。蓮朵靜淹紅。半引彎彎月。微生瑟瑟風。無思復無慮。此味幾人同。



自和

一片殘陽景，朦朧淡月中。蘭芽紆嫩紫，梨頰抹生紅。琴阮資清格，冠簪養素風。煙霄半知足，吏隱少相同。

早春西園

引步攜筇竹，西園小徑通。雪欹梅蒂綠，春入杏梢紅。靜意崖穿漏，孤愁笛破空。如何將此景，收拾向圖中。

碧鮮亭

鸛鸞籠清籟，蕭蕭鑠翠陰。向高思盡節，從直美虛心。迴砌滋蒼蘚，幽窗伴素琴。公餘時引步，一徑靜中深。

清漣閣

照影翻窗綺，層紋滉額波。絲青迷岸柳，茸綠蘸汀莎。片雪翹飢鷺，孤香卷嫩荷。憑欄堪入畫，時聽竹枝歌。

採桑女

採桑知蠶飢，投梭惜夜遲。誰誇羅綺叢，新畫學月眉。

渡溪

渡溪溪水急，水濺羅衣溼。日暮猶未歸，盈盈水邊立。

湖口縣

柴桑分邑載圖經，屈曲山光展畫屏。最是蘆洲東北望，人家殘照隔煙汀。

岳州衆湖阻風



偶繫扁舟枕綠莎。旋移深處避驚波。曉來閑共漁人話。此去巴陵路幾多。

西塞山二首

今謂之道士磯。卽興國軍大冶縣所隸也。

西塞名山立翠屏。濃嵐橫入半江青。千尋鐵鎖無由問。石壁空存道者形。  
匹婦頑然莫問因。匹夫何去望千春。翻思岵岵傳詩什。舉世曾無化石人。

宿疎陂驛

秋染棠梨葉半紅。荊州東望草平空。誰知孤宦天涯意。微雨蕭蕭古驛中。

再經秭歸二首

總角曾隨上峽船。尋思如夢可悽然。夜來孤館重來宿。枕底灘聲似舊年。  
秭歸城邑昔曾過。舊職無人奈老何。獨有淒清難改處。月明聞唱竹枝歌。

巫山公署壁有無名氏畫戲書二韻

南陵直上路盤盤。平地凌雲勢萬端。堪笑巴民不厭足。更嫌山少畫山看。

會噲岑山人

渝州江上忽相逢。說隱西山最上峯。略坐移時又分別。片雲孤鶴一枝筇。

路次覆盆驛



會上青泥蜀道難。架空成路入雲寒。如何卻向巴東去。三十六盤天外盤。

無題二首

冰雪肌膚力不勝。落花飛絮遶風亭。不知何事鞦韆下。蹙破愁眉兩點青。  
梨花如雪已相迷。更被驚烏半夜啼。簾捲玉樓人寂寂。一鉤新月未沈西。

巫山廟

廟前溪流潺潺。廟中修竹聲珊珊。襄王一夢杳難問。晚晴空氣歸雲閑。

施南太守以猿兒爲寄作詩答之

虞人初獲西江西。長臂難將意馬齊。今日未啼頭已白。不堪深入白雲啼。



全五代詩卷八

梁

許鼎

鼎梁貞明六年登第。

登嶺望

淼淼三江水。悠悠五嶺關。雁飛猶不度。人去若為還。

一作何時還。

嶠嶺四望

漢家仙仗在咸陽。洛水東流出建章。野老至今猶望幸。離宮秋樹獨蒼蒼。

韋洵美

洵美梁人。為羅紹威從事。

答素娥

別恨離羣自古聞。此心難捨意難論。承恩必若頒時服。莫使霑濡有淚痕。

路德延



德延冠氏人。光化初擢第。授拾遺。梁太祖時河中節度使。朱友謙辟掌書記。

五代詩話路德延儋州巖相之猶子。數歲賦芭

蕉詩曰。一種靈苗異。天然體性虛。葉如斜界紙。心似倒抽書。翌日傳于都下。會儋州坐事誅。德延久不能振。光化初方擢第。又爲感舊詩。初騎竹馬詠芭蕉。嘗忝名卿誦滿朝。五字便容趨絳帳。一枝尋許折丹霄。豈知流落萍蓬遠。不覺推遷歲

月遙國境未安身未立。至今顏巷守簞瓢。全唐詩話友謙辟德延掌書記甚禮之。然德延浮薄動多忤物。友謙解體。德延乃作小兒詩以刺之。

小兒詩

情態任天然。桃紅兩頰鮮。乍行人共看。初語客多憐。臂膊肥如瓠。肌膚軟勝綿。長頭纔覆額。分角漸垂肩。散誕無塵慮。逍遙占地仙。排衙朱閣上。喝道畫堂前。合調歌楊柳。齊聲踏採蓮。走隄行細雨。奔巷趁輕煙。嫩竹乘爲馬。新蒲折作鞭。鶯雛金鏃繫。猫子綵絲牽。擁鶴歸晴島。驅鵝入暖泉。楊花爭弄雪。榆葉共收錢。錫鏡當胸挂。銀珠對耳懸。頭依蒼鶻裏。袖學柘枝揎。酒滯丹砂暖。茶催小玉煎。頻邀籌箸掙。時乞繡鍼穿。寶篋拏紅豆。妝奩拾翠鈿。戲袍披按褥。劣帽戴靴氈。展畫趨三聖。開屏笑七賢。貯懷青杏小。垂額綠荷圓。驚滴露羅淚。嬌流污錦涎。倦書饒姪姹。憎藥巧遷延。弄帳鸞綃映。藏衾鳳綺纏。指敲迎使鼓。筋撥賽神弦。簾拂魚鉤動。箏推雁柱偏。碁圖添路畫。笛管欠聲鐫。惱客初酣睡。驚僧半入禪。尋蛛窮屋瓦。探雀遍樓椽。拋果忙開口。藏鉤亂出拳。夜分圍楸枰。朝聚打鞦韆。折竹裝泥燕。添絲放紙鳶。互誇輪水碓。相教放風旋。旗小裁紅絹。書幽截碧牋。遠鋪張鷟網。低控射蠅弦。詰語時時道。謠歌處處傳。匿牕眉乍曲。遮路臂相連。



鬪草當春逕。爭毬出晚田。柳傍慵獨坐。花底困橫眠。等鵲前籬畔。聽蛩伏砌邊。傍枝粘舞蝶。隈樹捉鳴蟬。  
平島誇趨上。層崖逞捷緣。嫩苔車跡小。深雪履痕全。競指雲生岫。齊呼月上天。蟻窠尋逕斷。蜂穴遶階填。  
樵唱迴深嶺。牛歌下遠川。壘柴爲屋木。和土作盤筵。險砌高臺石。危跳峻塔磚。忽陞隣舍樹。偷上後池船。  
頂橐稱師日。甘羅作相年。明時方任德。勸爾減狂顛。

韓定辭

定辭深州人。梁太祖時爲鎮州趙王王鎔書記。觀察判官檢校尙書祠部郎中兼侍御史。

全唐詩話

東坡紀唐事云。定辭不知何許人。爲鎮州王鎔書記。聘燕帥劉仁恭舍于賓館。命幕客馬郁延接。馬有詩贈韓。意在試其學問。韓卽席酬之云云。坐內諸賓靡不欽訝。稱爲妙句。然亦疑其銀筆之辭也。他日郁從容問韓以雪兒銀筆之事。韓曰。昔梁元帝爲湘東王。好著書。常記錄忠臣義士及文章之美者。筆有三品。以金銀雕飾。或用班竹爲管。忠孝全者。金管書之。德行精粹者。銀管書之。文章瞻麗者。以班竹管書之。故湘東王之譽。振于江表。雪兒李密之愛姬。能舞。每見賓僚文章有奇麗者。卽付雪兒。叶音律以歌之。又問癡龍出自何處。曰。洛下有洞穴。曾有人誤墜於中。因行數里。漸明。曠見有宮室人物。凡九處。又有大羊。羊髯有珠。人取食之。不知何所。後出以問張華。華曰。此地仙九館也。大羊名癡龍。工定辭。復問郁。囀豸之山。當在何處。郁曰。此隋郡之故事。何謙遜而下問。由是兩相悅服。結交而去。侍兒小名錄。劉崇遠耳目記云。趙王鎔命馬彧使于燕。劉守光命定辭館之時。燕之酒伎轉轉者。一代名姝。韓之所眷也。每當酒席。馬頰目之。韓曰。昔文公分叔隗于趙衰。伯符輟小喬于公瑾。蓋惟名色可奉名人。所慮倡婦不勝賢者。顧矚願垂一詠。故得奉之。彧卽命題。文不停綴。作轉轉之賦。其首曰。玳筵旣啓。雅樂斯陳。霧卷羅幕。花攢錦茵。有西園之上客。命南國之佳人。邈逞嬋娟。縱玉韻而



傾國步移縹緲。蹴羅襪以生塵。遂載以歸。按此又以馬為趙使燕。以二詩證之。此為誤記。

答馬彘

崇霞臺上神仙客。學辨癡龍藝最多。盛德好將銀管述。麗詞堪與雪兒歌。

馬彘

彘梁時人。少事盧龍鎮帥李匡威。署幕職。開平初。匡威滅。復事燕王劉仁恭。

贈韓定辭

燧林芳草綿綿思。盡日相攜陟麗譙。別後巔嵒山上望。羨君時復見王喬。

張直

直濮州人。號逍遙先生。梁太祖時。青州王師範嘗聘之。

五代詩話。師範頗好儒學。聚書至萬卷。為梁河陽節度使。張直往就聘。有宿顧城詩二首云云。

宿顧城二首

顧城在范縣東。

綠草展青裯。樾影連春樹。茅屋八九家。農器六七具。主人有好懷。褰衣留我住。春酒新潑醅。香美連糟濾。一醉臥花陰。明朝送君去。

醉臥夜將半。土底聞雞啼。驚駭問主人。為我剖荒迷。武湯東伐韋。固君含悲悽。神奪悔悟魄。幻化為石雞。



形骸僅盈寸。呻喔若啁蜺。吾村耕耘叟。多獲於鋤犁。

温 憲

憲庭筠之子。光啓中登進士第。梁初爲山南從事。有集。

北夢瑣言。有温顓者。飛卿之孫。憲之子。仕蜀。官常侍。無他能。唯僻繪事。温氏之先貌陋。時號鍾道憲。

子顓。顓子

郢俱肖之。

郊居

村前村後樹。寓賞有餘情。青麥路初斷。紫花田未耕。雉聲聞不到。山勢望猶橫。冥冥春風裏。吟酣信馬行。

杏花

團雪上晴梢。紅明映碧寥。店香風起夜。村白雨休朝。靜落猶和蒂。繁開正蔽條。澹然閑賞久。無以破妖嬈。

春鳩

村南微雨新。平綠淨無塵。散睡桑條暖。閑鳴屋脊春。遠聞和曉夢。相應在諸隣。行樂花時節。追飛見亦頻。

秦韜玉

韜玉字仲明。京兆人。中和二年得准勅及第。以工部侍郎爲田令孜神策判官。所著有投知小

錄。據言韜玉有詞藻。亦工長短歌。有貴公子行云云。然慕栢耆爲人。至於噪進。駕辛西蜀。爲田令孜擢用。未期歲。官至承

郎判鹽鐵。特賜及第。按唐書。王重榮詒普王克用書。且言奉密詔。須公到使我圖公。此令孜朱全忠朱玫之惑上也。因



示偽詔克用方與全忠有隙。信之。請討全忠及攻。帝數詔和解。重榮不受命。與克用謀定王室。楊復恭代令孜。領神策。帝西狩。令孜遂入川爲十軍容使。時韜玉隨至軍中。後蜀太祖王建殺令孜。全蜀遂爲建有。梁時韜玉不知所終。

採茶歌

天柱香芽露香發。爛研瑟瑟穿荻箨。太守憐才寄野人。山童碾破團團月。倚雲便酌泉聲煮。獸炭潛然蚪珠吐。看著晴天早日明。鼎中颯颯篩風雨。老翠香塵下纔熟。攪時繞筯秋雲綠。耽書病酒兩多情。坐對閩甌睡先足。洗我胸中幽思清。鬼神應愁歌欲成。

貴公子行

堦前莎毬綠不捲。銀龜噴香挽不斷。亂花織錦柳撚線。妝點池臺畫屏展。主人公業傳國初。六親聯絡馳朝車。鬪雞走狗家世事。抱來皆佩黃金魚。卻笑儒生把書卷。學得顏回忍飢面。

吹笙歌

信陵名重憐高才。見我長吹青眼開。使出燕姬再傾醕。此時花下逢仙侶。彎彎狂月壓秋波。兩條黃金閤黃霧。逸豔初因醉態見。濃春可是韶光與。纖纖軟玉捧暖笙。深思香風吹不去。檀唇呼吸宮商改。怨情漸逐清新舉。岐山取得嬌鳳雛。管中藏著輕輕語。好笑襄王大迂闊。曾臥巫雲見神女。銀鎖金簧不得聽。空勞翠輦衝泥雨。

長安書懷



涼風吹雨商寒更。鄉思欺人撥不平。長有歸心懸馬首。可堪無寐枕蛩聲。嵐收楚岫和空碧。秋染湘江到底清。早晚身閑著簑去。橘香深處釣船橫。

翠雲交幹瘦輪囷。嘯雨吟風幾百春。深蓋屈盤青麈尾。老皮張展黑龍鱗。唯堆寒色資琴興。不放秋聲染俗塵。歲月如波事如夢。竟留蒼翠待何人。

春雪

雲重寒空思寂寥。玉塵如糝滿春潮。片纔著地輕輕陷。力不禁風旋旋銷。惹砌任他香粉妒。縈叢自學小梅嬌。誰家醉卷珠簾看。弦管堂深暖易調。

讀五侯傳

漢亡金鏡道將衰。便有姦臣競佐時。專國祇誇兄弟貴。舉家誰念子孫危。後宮得寵人爭附。前殿陳誠帝不疑。朱紫盈門自稱貴。可嗟區宇盡瘡痍。

貧女

蓬門未識綺羅香。擬託良媒益自傷。誰愛風流高格調。共憐時世儉梳妝。敢將十指誇偏巧。不把雙眉鬪畫長。苦恨年年壓金線。爲他人作嫁衣裳。

題竹



削玉森森幽思清。阮家高興尙分明。捲簾陰薄漏山色。欹枕韻寒宜雨聲。斜對酒缸偏覺好。靜籠棋局最多情。卻驚九陌輪蹄外。獨有溪煙數十莖。

鸚鵡

每聞別雁競悲鳴。卻歎金籠寄此生。早是翠襟爭愛惜。可堪丹觜彊分明。雲漫隴樹魂應斷。歌接秦樓夢不成。幸自彌衡人未識。賺他作賦被時輕。

對花

長與韶光暗有期。可憐蜂蝶卻先知。誰家促席臨低樹。何處橫釵帶小枝。麗日多情疑曲照。和風得路合偏吹。向人雖道渾無語。笑勸王孫到醉時。

題刑部李郎中山亭

儂家雲水本相知。每到高齋強展眉。瘦竹籜煙遮板閣。卷荷擎雨出盆池。笑吟山色同欹枕。閑背庭陰對覆棋。不是主人多野興。肯開青眼重漁師。

八月十五日夜同衛諫議看月

常時月好賴新晴。不似年年此夜生。初出海濤疑尙溼。漸來雲路覺偏清。寒光入水蛟龍起。靜色當天鬼魅驚。豈獨座中堪仰望。孤高應到鳳凰城。

邊將



劍光如電馬如風。百捷長輕是掌中。無定河邊蕃將死。受降城外虜塵空。旗縫雁翅和竿裹。箭撚雕翎逐隼雄。自指燕山最高石。不知誰爲勒殊功。

塞下  
到處人皆著戰袍。麾旗風緊馬蹄勞。黑山霜重弓添硬。青冢沙平月更高。大野幾重開雪嶺。長河無限舊雲濤。風林關外皆唐土。何日陳兵戍不毛。

識錦婦  
桃花日日覓新奇。有鏡何曾及畫眉。祇恐輕梭難作匹。豈辭纖手遍生胝。合蟬巧間雙盤帶。聯雁斜銜小折枝。豪貴大堆酬曲徹。可憐辛苦一絲絲。

釣翁  
一竿青竹老江隈。荷葉衣裳可自裁。潭定靜懸絲影直。風高斜颭浪紋開。朝攜輕棹穿雲去。暮背寒塘戴月回。世上無窮嶮巇事。算應難入釣船來。

曲江  
曲沼深塘躍錦鱗。槐煙徑裏碧波新。此中境旣無佳境。他處春應不是春。金榜真仙開樂席。銀鞍公子醉花塵。明年二月重來看。好共東風作主人。

隋隄



種柳開河爲勝遊。隄前常使路人愁。陰埋野色萬條思。翠束寒聲千里秋。西日至今悲兔苑。東坡終不反龍舟。遠山應見繁華事。不語青青對水流。

曲江對天街

九衢風景盡爭新。獨占天門近紫宸。寶馬競隨朝暮客。香車爭碾古今塵。烟光正入南山色。氣勢遙連北闕春。莫見繁華祇如此。暗中還換往來人。

紫駟馬

渥洼奇骨本難求。況是豪家重紫駟。臆大宜懸銀壓胯。力渾欺著玉銜頭。生獰弄影風隨步。蹀躞衝塵汗滿溝。若遇丈夫能控馭。任從騎取覓封侯。

問古

大底榮枯各自行。兼疑陰隲也難明。無門雪向頭中出。得路雲從足下生。深作四溟何浩渺。高爲五嶽太崢嶸。都來總向人間看。直到皇天可是平。

豪家

石甃通渠引御波。綠槐陰裏五侯家。地衣鎮角香獅子。簾額侵鉤繡辟邪。按徹清歌天未曉。飲回深院漏猶賒。四隣池館吞將盡。尙自堆金爲買花。

陳宮



臨春高閣擬瀛洲。貪寵張妃作勝遊。便把江山爲己有。豈知臺榭是身讐。金城暗逐歌聲碎。鐵甕潛隨勢休。誰識古宮堪恨處。井桐吟雨不勝秋。

送友人罷舉授南陵令

共言愁是酌離杯。況值弦歌枉大才。獻賦未爲龍化去。除書猶喜鳳銜來。花明驛路燕脂暖。山入江亭罨畫開。莫把新詩題別處。謝家臨水有池臺。

春遊

選勝逢君敝解攜。思和芳草遠煙迷。小梅香裏黃鶯囀。垂柳陰中白馬嘶。春引美人歌板熟。風牽公子酒旗低。早知有此關身事。悔不前年住越溪。

咏手

一雙十指玉纖纖。不是風流物不粘。鸞鏡巧梳勻翠黛。畫樓閑望擘珠簾。金杯有喜輕輕點。銀鴨無香旋旋添。因把剪刀嫌道冷。泥人呵了弄人髻。

燕子

不知大廈許栖無。頻已銜泥到座隅。曾與佳人並頭語。幾回拋卻繡工夫。

黃巢



巢冤句人舉進士不第廣明作亂破京都後滅于秦山狼虎谷

貴耳集巢五歲時侍其翁與父為菊花詩翁未就巢信口曰堪與百花為總首

自然天賜赭黃衣父怪欲擊之翁曰可令再賦巢應聲云颯颯西風滿院栽藥寒香冷蝶難來他年我若為青帝報與桃花一處開又不第復賦菊云待到秋來九月八我花開後百花殺衝天香陳透長安滿城盡帶黃金甲又陶穀五代亂離

紀云巢敗後為僧依張全義于洛陽曾繪像題詩人見像識其為巢云

自題像

記得當年草上飛鐵衣著盡著僧衣天津橋上無人識獨倚欄干看落暉

李夢符

夢符梁開平初人

全唐詩話梁開平初夢符在洪州日與布衣飲酒狂吟嘗以釣竿懸一魚向市肆唱漁父引賣其詞好事者爭買之得銀便入酒家或抱冰入水及出身上氣如蒸後不知所在人察考取狀答曰

插花飲酒何妨事樵唱漁歌不礙時人遂不敢復問又夢符遊南昌時鍾傳據其地有桂州刺史李瓊遣人謂傳曰夢符吾弟請遣歸鍾令求於市邸人曰夜來不歸不知所之有回常學士詩云云

回常學士

罷修儒業罷修真養拙藏愚春復春到老不疎林裏鹿平生難見日邊人洞桃深處千株錦岩雪鋪時萬草新深謝名賢遠相訪求聞難禱鳳為隣

漁父引



村寺鐘聲度遠灘。半輪殘月落山前。徐徐撥櫂卻歸灣。浪疊朝霞錦繡翻。  
漁弟漁兄喜到來。波官賽卻坐江隈。椰榆杓子木瘤杯。爛煮鱸魚滿案堆。

陸禹臣

禹臣字服休。河東人。

全唐詩話。避黃巢亂。入南嶽得仙術。隱宜州北山。後尸解為紫府仙伯。嘗寓吳生家。與語塵外理。

贈吳生

露下瑤簪湯。雲生石室寒。星壇鸞鶴舞。丹竈虎龍蟠。

劉元英

元英初名操。燕地廣陵人。以明經擢第。仕燕主劉守光為相。後得道號海蟾子。

湖廣總志。元英為相。一旦忽有道人

來謁。自稱正陽子。索雞卵十枚。金錢十枚。以一文置几上。累十卵于錢。若浮圖之狀。海蟾驚嘆曰。危哉。道人曰。人居榮樂之場。履憂患之地。其危有甚于此者。復盡以其錢擘為二。擲之而去。海蟾由此大悟。遂易服從道。宋仁宗天聖九年。遊歷名山。所至多有遺跡。一日于潭州壽寧觀題古詩十韻云云。仍自寫真其旁。撮襟書龜鶴齊壽四字。題云。廣寧閑民劉某書。丹成尸解。至元六年。贈海蟾明悟宏道真君。

題潭州壽寧觀

醉走白雲來。倒提銅尾柄。引筒碧眼奴。擔著獨壺瘦。自言秦世事。家住葛洪井。不讀黃庭經。豈燒龍虎鼎。獨立都市中。不愛俗人請。欲携霹靂琴。去上芙蓉頂。吳牛買十角。溪田耕半頃。種秫釀白醪。總是仙家境。



醉眠松陰下。閑過白雲嶺。要去即便去。直入秋霞影。

張無夢

無夢字靈隱。號鴻濛子。與劉海蟾為方外友。遊天台登赤城。廬于瓊臺觀。宋初召對。除著作郎。不受。賜還山。令台州給俸以養老。有瓊臺集。

天台桐柏觀

天台瀑布落青天。觀在天台瀑布邊。道士祇今燒藥處。仙翁曾是種芝田。龍居古洞遺殘雨。鶴出高巢點破煙。暫別靈谿遊五岳。不知重到又何年。

懷楚

楚唐末僧。梁初住安州白兆竺乾院。

送新平故人

常聽倉庚思舊友。又因蝴蝶夢生涯。一千餘里河連郭。三十六峯寒到家。陰鳥直分東虢雁。晴樓高入上陽鴉。姜姬廟北與君別。應笑薄寒悲落花。

子蘭

蘭昭宗朝文章供奉。入梁卒。

詩話。元祐元年四月。朱全忠逼昭宗遷都洛陽。盡徙長安居人以東。子蘭有悲長安詩云。何事天時禍未回。生靈愁悴苦寒灰。豈知萬頃繁華地。強半今為瓦礫堆。又長



安傷春詩云。霜隕中春半。點無狂遊恣。飲盡兇徒。年年賞翫公卿輩。今委溝塍骨漸枯。又晚望詩云。雨添一夜秋濤闊。極目茫茫似接天。不知龍物潛何處。魚躍蛙鳴滿檻前。皆爲朱全忠而作也。

飲馬長城窟

游客長城下。飲馬長城窟。馬嘶聞水腥。爲浸征人骨。豈不是流泉。終不成潺湲。洗淨骨上土。不洗骨中冤。骨若比流水。四海有還魂。空流嗚咽聲。聲中疑是言。

華嚴寺望樊川

萬木葉初紅。人家樹色中。疎鐘搖雨腳。秋水浸雲容。雪磧回寒雁。村燈促夜舂。舊山歸未得。生計欲何從。

觀棋

拂局盡消時。能因長路遲。點頭初得計。格手待無疑。寂默親遺景。凝神入過思。共藏多少意。不語兩相知。

與道侶同於冰陸寺會宿

論道窮心少有朋。此時清話昔年曾。柿凋紅葉鋪寒井。鵠墜霜毛著定僧。風遶遠聲秋澗水。竹穿深色夜房燈。出門盡是勞生者。只此長閑幾箇能。

襄陽曲

爲憶南遊人。移家大堤住。千帆萬帆來。盡過門前去。

鸚鵡



翠毛丹紫乍教時。終日無寥似憶歸。近來偷解人言語。亂向金籠說是非。

白衫舉子

侯鯖球敬翔當權時有一舉子白衫作舞歌唱云

執板狂歌乞個錢。塵中流浪且隨緣。直饒到老常如此。猶勝危時弄化權。

黃冠野夫

授馬氏女詩

黃鹿真人馬氏女者。幼好道。有黃冠野夫年踰七十。顏如渥丹。傳鉛汞符篆要術。易其名爲道興。授詩而行。後結菴於廬江之東。復遇野夫。與鎮壇金銀爲黃鹿白鵝之精。天祐末。盜欲取之。逐驂駕黃鹿白鵝前引。騰

空而逝。如所授詩之言。

女是寄生枝。男是冬青木。冬青駕白鵝。寄生跨黃鹿。若遇寇相凌。穩便拋家族。早早上三青。莫候丹砂熟。

崔素娥

素娥韋洵美妾

侍兒小名錄。洵美先輩開平歲及第。受鄴都從事辟。馬乃挈所寵素娥行。羅紹威聞其姝麗才達。臨河令女使齎二百疋。及生餼而露意焉。洵美無所容足。遂令妝束更衣。修緘獻之。素娥姓崔氏。大梁良家

子。善諧謔。筆札和淚作詩云云。洵美乃不受。辟渡河宿一寺。長吁而寢。曰。何處人能報不平事。有行者排闥而揖曰。先輩蓄何不平等事。洵美具語之。欷然出門而去。至三更。忽擲一皮囊入門。乃貯素娥而至。侵曉問寺僧。言在寺打鐘三十餘年。已不知所之。洵美卽蹤跡他所。

美卽蹤跡他所。



妾閉閑房君路歧。妾心君恨兩依依。神魂倘遇巫娥伴，猶逐朝雲暮雨歸。

洛陽人

嘲跋異

劉道醇五代名畫記。異汧善畫佛像。梁龍德中。洛陽廣愛寺僧邀之。畫三門兩壁。時有張將軍圖。尤善丹青。異方用朽。圖長揖而進。擲筆倏忽而成。右堵異賭跡驚讓。聽其成之。洛陽人因為謔嘲。異云。赫赫洛下。唯說異畫。張氏出頭。跋異無價。後福先寺請異畫大殿護法善神。有滑臺人李羅漢來與角畫。異恐如張圖。讓西壁與之。自竭思成一神像。平生所未能。李見之媿甚。自縊死。時人復嘲之云云。

李生來跋君怕。不意今日卻增價。不畫羅漢畫駝馬。

驪山遊人

題故翠微宮

談苑。翠微寺在驪山絕頂。舊驪宮也。唐太宗避暑于此。後寺亦廢。有遊人題云。

翠微寺本翠微宮。樓閣亭臺幾十重。天子不來僧又去。樵夫時倒一株松。

楊萊兒

萊兒字蓬仙。進士趙光遠溺之。後為豪家所得。

和趙光遠題壁

長者車塵每到門。長卿非慕卓王孫。定知羽翼難隨鳳。卻喜波濤未化鯤。嬌別翠鈿黏去袂。醉歌金雀碎殘尊。多情多病年應促。早辦名香為返魂。



答小子弟詩

光遠恃才。萊兒大誇于客。指光遠為一鳴先輩。放榜日。盛飾立門以俟。小子弟馬上念詩。譴之。萊兒答云。

黃口小兒口莫

一作沒

憑。遂巡看取第三名。孝廉持水添餅子。莫向街頭亂碗鳴。

小子弟譴萊兒詩云。盡道萊兒口可憑。一冬誇壻好聲名。適來安遠

門前見光遠何曾解一鳴。

王福娘

福娘字宜之。解栗人。北里前曲妓也。

題孫棨詩後

棨贈福娘詩。俱題窗左紅牆後。有數行未滿。福娘因自題一絕。

苦把文章邀勸人。吟看好箇語言新。雖然不及相如賦。也直黃金一二斤。

題紅箋詩

宜之每歡洽際。嘗自慘然。一日忽以紅箋題詩。授棨索和。

日日悲傷未有圖。嬾將心事話凡夫。非同覆水應收得。只問仙郎有意無。

棨答福娘詩云。韶妙如何有遠圖。未能相為信非夫。泥中蓮子雖無染。移入家

園未得無。

擲紅巾詩

棨自洛還京。上巳日禊于水曲。聞鄰棚絲竹。宜之在焉。詰旦且詣其里。其妹小福在門。團紅巾擲棨。舒之。則宜之詩也。



久賦恩情欲託身。已將心事再三陳。泥蓮既沒移栽分。今日分離莫恨人。

梁初朝士

觀野花思京師舊遊

會過街西看牡丹。牡丹纔謝便心闌。如今變作村園眼。鼓子花開也喜歡。

河北諺

梁將侍中葛從周有殊功。鎮青社。人為語曰。

山東一條葛。無事莫撩撥。

王彥章諺語

人死留名。豹死留皮。

長安中鬼

秋夜吟

長安秋夜有人聞鬼吟。又有和者。相傳務本門是鬼市。或風雨晦明皆聞其誼聚之聲焉。

六街鼓歇行人絕。九衢茫茫室有月。吟九衢生人何勞勞。長安土盡槐根高。和

高麗鏡文

梁末帝貞明三年。王建立為王。市有異人賣古鏡。有文云云。文人宋含宏解之曰。三水中四維下。上帝降子于辰馬者。辰韓馬韓也。巳年中二龍見。一則藏身青木中。一則見形黑金東。青木松也。謂松岳郡人。以龍為名者之子。

孫可為君王也。黑金鐵也。指鐵圓謂今王初盛於此。始終滅于此乎。先操雞後搏鴨者。王侍中得國後。先得雞林。後收鴨綠之意也。弓裔令物色。求異人東州勃颯寺。有鎮星塑像如其狀。



三水中四維下。上帝降子於辰馬。先操雞後搏鴨。巳年中二龍見。一則藏身青木中。一則見形黑金東。

梁太廟樂舞辭

五代會要。梁開平二年正月。太常奏定享太廟樂。迎神舞。開平之舞。迎俎奏慶肅之樂。酌獻奏慶熙。飲福酒奏慶隆。送文舞。迎武舞。奏慶融。亞獻終獻。奏慶休。唐餘錄。梁宗廟樂。迎神奏開平舞。次皇帝行。次帝盥。

次登歌。獻肅祖奏大合之舞。恭祖奏象功之舞。憲祖奏來儀之舞。列祖奏昭德之舞。次飲福。次撤豆。次送神。

開平舞

黍稷馨醴。醕清牲牲。恠潔金石。鏗恭祀事。結皇情。神來格。歌頌聲。

皇帝行

處高者天。攀躋弗克。隋天有方。累仁積德。祖宗隆之。子孫履之。配天明祀。永永孝思。

帝盥

莊肅蒞事。周旋禮容。裸鬯嚴潔。穆穆雍雍。

登歌

於赫我皇。建中立極。動以武功。靜以文德。昭事上帝。歡心萬國。大報嚴禋。四海述職。

大合舞

於穆皇祖。濬哲雍熙。美溢中夏。化被南陲。后稷累德。公劉創基。肇興九廟。樂合來儀。

象功舞



天地合德。睿聖昭彰。累贈太傅。俄登魏王。雄名不朽。奕葉而光。建國之兆。君臨萬方。  
來儀舞

於赫帝命。應天順人。亭育品彙。賓禮百神。洪基永固。景命維新。肅恭孝享。祚我生民。

昭德舞

肅肅文孝。源濬派長。漢稱誕季。周實生昌。奄有四海。超彼百王。笙鏞迭奏。禮物熒煌。

飲福

戛玉攬金。永頌聲槩。絲孤竹和。且清靈歆。醉止犧象。盈自天降。福千萬齡。

撒豆

笙鏞洋洋。庭燎煌煌。明星有爛。祝史下堂。蓬豆斯撤。禮容有章。克勤克儉。無怠無荒。

送神

其降無從。其往無蹤。黍稷非馨。有感必通。赫奕令德。髣髴睟容。再拜慌忽。遐想昊穹。



主水中... 陛下... 帝... 陛下... 帝... 陛下... 帝...

聖大廟

聖大廟... 聖大廟... 聖大廟...

其判無... 其判無... 其判無... 其判無...

聖廟... 聖廟... 聖廟... 聖廟...

聖廟... 聖廟... 聖廟... 聖廟...

聖廟... 聖廟... 聖廟... 聖廟...

聖廟... 聖廟... 聖廟... 聖廟...

聖廟... 聖廟... 聖廟... 聖廟...

聖廟... 聖廟... 聖廟... 聖廟...

聖廟... 聖廟... 聖廟... 聖廟...

聖廟... 聖廟... 聖廟... 聖廟...

聖廟... 聖廟... 聖廟... 聖廟...

聖廟... 聖廟... 聖廟... 聖廟...



全五代詩卷九

唐

莊宗

莊宗名存勗。太祖李克用長子。天祐五年嗣立為晉王。破燕滅梁。遂襲尊號。改元同光。在位三年。諡莊宗。廟號雍陵。

五代史補莊宗公子時雅好音律又能自撰曲子詞其後凡用軍皆以所撰詞授之使揚聲而唱謂之御製至于入陣不論勝負馬頭纒轉則衆唱齊作故人忘其死斯亦用軍之一奇也

翰府名談莊宗時禁旅王慶乞敘功賞李嗣源亦言其勞莊宗曰知慶薄有功但每見慶則憤然安得更有賜與之意因舉唐太宗詩曰待余心肯日是汝運通時北夢瑣言後唐明宗戒秦王從榮曰吾見先皇在藩時愛自作歌詩將家子文非素習未能盡妙諷于人口恐被諸儒竊笑時從榮方聚雜進士浮薄之子以歌詩吟咏為事以此言規諷之一日秦王進詩上說于俳優敬新磨新磨贊曰勿訝秦王詩好他阿爺平生愛作詩上大笑先皇即莊宗也

短歌 一作歌頭詞

賞芳春暖風飄箔。鶯啼綠樹輕煙籠。晚閣杏桃紅。開繡幕。靈和殿。禁柳千行斜。金絲絡。夏雲多。奇峰如削。紈扇動微涼。輕綃薄。梅雨霽。火雲爍。臨水檻。永日逃。繡暑。泛觥酌。露華濃冷。高梧彫萬葉。一霎晚風蟬聲新。雨歇惜惜此光陰。如流水。東籬菊殘時。歎蕭索。繡陰積。歲時暮。景難留。不覺朱顏失卻。好容光。且且須呼賓友。西園長宵讌。雲謠歌皓齒。且行樂。



馮道

道字可道瀛州景城人初事劉守光為參軍事敗去事宦者張承業為巡官薦之晉王為掌書記唐莊宗即位拜戶部侍郎明宗朝同中書門下平章事歷事晉漢周卒年七十二自號長樂老諡文懿追封瀛王詩集十卷

長樂老傳自敘略曰余先自燕亡歸唐事莊宗明宗閔帝清泰帝又事晉高祖皇帝少帝契丹據汴京為戎二主所制自鎮州與文武臣察馬步將士歸漢朝事高

祖皇帝今上久叨祿位備歷艱危階自將仕郎轉朝議郎朝散大夫朝議大夫銀青光祿大夫光祿大夫特進開封儀同三司職自幽州節度巡官河東節度巡官掌書記再為翰林學士改授瑞明殿學士集賢殿大學士太微宮使再為宏文館大學士又充諸道鹽鐵轉運使南郊大禮使明宗皇帝晉高祖皇帝山陵使再授定國軍節度司州管內觀察處置等使一為長春宮使又授武勝軍節度鄧隨均房等州管內觀察處置等使官自攝幽府參軍試大理評事檢校尚書祠部郎中兼侍御史檢校吏部郎中兼御史中丞檢校太尉同中書門下平章事檢校太師兼侍中又授檢校太師兼中書令正官自行臺中書舍人再為戶部侍郎轉兵部侍郎中書侍郎再為門下侍郎刑戶吏尚書右僕射左僕射三為司空兩在中書一守本官又授司徒兼侍中賜私門十六戟又授太尉兼侍中又授漢太師爵自開國男至開國公魯國公再封秦國公梁國公燕國公食邑自三百戶至一萬一千戶食實封自一百戶至一千八百戶勳自柱國至上柱國功臣名自經邦致理功臣至守正崇德保邦致理功臣安時處順守義崇靜功臣崇仁保德寧邦翊聖功臣靜思本末非人之謀是天之佑時開一卷時飲一杯食味別聲被色老而自樂何樂如之北夢瑣言宰相馮道形神庸陋一旦為丞相士人多竊笑之劉岳與任贊偶語是道行而復顧贊曰新相回顧何也岳曰定是忘持兔園冊來道之鄉人在朝者聞之告道道因授岳祕書監任贊授散騎常侍北中村墅多以免園冊教蒙童以是譏之然免園冊乃徐庾文體非鄙朴



之談但家藏一本人多賤之也。青箱雜記世譏馮瀛王依阿詭隨不能死節王荆公雅愛道謂其能屈身以安人如佛菩薩行其所作詩雖淺近而多諳理。五代史天成長興之間歲屢豐熟中國無事道嘗戒明宗曰臣爲河東掌書記時奉使中山過井陘之險懼馬蹶失不敢怠於銜轡及至平地謂無足慮遽跌而傷凡蹈危者慮深而獲全居安著患生於所忽此情人之常也明宗問曰天下雖豐百姓濟否道曰穀貴餓農穀賤傷農因誦文士聶夷中田家詩其言近而易曉明宗顧左右錄其詩常以自誦。叢苑天福三年與戎和當遣輔相爲使趙瑩桑維翰同堂皆未言以戎反覆難測咸懼于將命馮道與諸公中書食訖堂吏前白北使事色變手顫道索紙一幅書云道去卽遣寫勅遂舍都亭驛不復歸家虜以道有重名命與其國相同列戎賜臣下牙笏及臘月賜牛頭皆爲殊禮道皆得之以詩謝云牛頭偏得賜象笏更容持虜中大寒賜道錦襖貂襖羊狐貂各一每入謁悉服四襖宿館中并覆三衾有詩曰朝被四襖專藏手夜覆三衾怕露頭及還京師作詩五章述北使之意首章云云。總龜瀛王性仁厚家有一池每得魚放池中其子監承每竊釣之瀛王聞之不悅於是高其牆垣鑰其門戶作詩書其門曰高卻垣牆鎖卻門監丞從此罷垂綸池中魚鼈應相賀從此方知有主人。續翰林志同光中承旨盧質節制河中道贈之詩略云視草北來唐學士擁旄西去漢將軍。玉壺清話竇禹鈞生五子儀儼侶侑僖等相繼登科馮瀛王贈禹鈞詩燕山竇十郎教子有義方靈椿一樹老丹桂五枝芳時號竇氏五龍懶真子同州澄城縣有九龍廟然只一妃土人云馮道女也夏縣司馬才仲題詩云身旣事十主女亦妃九龍過客讀之皆笑。調元按五代詩中有歷事數朝者甚多俱各按其事跡於何朝最著者卽編入其中至馮道身事五代共十君殊難位置今編于唐者從其朔也亦卽倣史家之例非敢臆斷也。

## 天道

窮達皆由命何須發嘆聲。但知行好事莫要問前程。冬去冰須泮春來草自生。請君觀此理天道甚分明。



偶作  
莫為危時便愴神。前程往往有期因。須知海岳歸明主。未省乾坤陷吉人。道德幾時曾去世。舟車何處不通津。但教方寸無諸惡。豺虎叢中也立身。

北使還京作

去年今日奉皇華。只為朝廷不為家。殿上一杯天子泣。門前雙節國人嗟。龍荒冬往時時雪。兔苑春歸處處花。上下一行如骨肉。幾人身死掩風沙。

盧文紀

文紀字子持。舉進士事。梁為集賢殿學士。唐明宗時為御史中丞。遷工部尚書。貶石州司馬。久之為太常卿。奉使於蜀。過鳳翔。廢帝時為節度使。見文紀奇之。後入立。拜為中書侍郎同中書門下平章事。周時進司空。  
五代史本傳。唐廢帝立。悉書清望宮姓名。內琉璃瓶中。夜焚香咒天。以筋挾之。首得文紀。欣然相之。晉高祖起太原。廢帝北征。過拜徽陵。顧文紀曰。吾自鳳翔識卿。不以常人

為待。今日使吾至此。卿宜如何。文紀謝罪而已。

後唐宗廟樂舞辭

仁君御宇。寰海謐清。運符武德。道協文明。九成式敘。百度惟成。金門積慶。玉葉傳榮。

盧汝弼



汝弼登進士第。以祠部員外郎知制誥。從昭宗遷洛。後依太祖。克用表爲節度副使。卒。唐莊宗時。贈兵部尙書。

五代史。汝弼。故唐時名族。與盧程門第相等。因共薦之。莊宗卽位。議擇宰相。而盧汝弼已死。乃以盧程爲相。拜命日。肩輿導從。喧呼道中。帝問左右對曰。宰相擔子入門。莊宗登樓視之。笑曰。所謂似是而非

者也。嘗謂郭崇韜曰。朕悞相此癡物。益思汝弼焉。李襲吉傳。盧汝弼代爲副使。封拜官爵。皆出汝弼。汝弼工書畫。而文辭不及襲吉。襲吉嘗爲書。諭梁太祖。使人讀之。至毒手尊拳。交相于暮夜。金戈鐵馬。蹂踐于明時。顏曰。李公僻處一隅。得士如此。使吾得之。傅虎以翼也。顧謂從事敬翔答之。而文辭亦不及云。北夢瑣言。汝弼嘗爲張相。潛出征判官。傳檄四方。其略云。致赤子之流離。自朱邪之板蕩。謂人曰。天生朱邪赤子。供我之筆也。

### 薄命妾

君恩已斷盡成空。追想嬌歡恨莫窮。長爲薜花光曉日。誰知團扇送秋風。黃金買賦心徒切。清露飛塵信莫通。閑凭玉欄思舊事。幾回春暮泣殘紅。

### 秋夕寓居精舍書事

葉滿苔塔杵滿城。此中多恨恨難平。疎簷看織蠹蛸網。暗隙愁聽蟋蟀聲。醉臥欲拋羈客思。夢歸偏動故鄉情。覺來獨步長廊下。半夜西風吹月明。

### 聞雁

秋風蕭瑟靜埃氛。邊雁迎風響咽羣。瀚海應嫌霜下早。湘川偏愛草初薰。蘆洲宿處依沙岸。榆塞飛時度晚雲。何處最添羈客恨。竹窗殘月酒醒聞。



鴛鴦

雙浮雙浴傍苔磯。蓼蒲蘭皋繡帳幃。長羨鸞鴦能潔白。不隨鷓鴣鬪毛衣。霞侵綠渚香衾暖。樓倚青雲殿瓦飛。應笑隨陽沙漠雁。洞庭烟暖又思歸。

和李秀才邊庭四時怨

春風昨夜到榆關。故國烟花想已殘。少婦不知歸不得。朝朝應上望夫山。盧龍塞外草初肥。雁乳平蕪曉不飛。鄉國近來音信斷。至今猶自著寒衣。八月霜飛柳半黃。蓬根吹斷雁南翔。隴頭流水關山月。泣上龍堆望故鄉。朔風吹雪透刀瘢。飲馬長城窟更寒。半夜火來知有敵。一時齊保賀蘭山。

趙延壽

延壽本姓劉。恆山人。仕後唐。尚主爲樞密使。清泰末。官至大丞相。封魏王。

五代史李崧傳。契丹入雁門。明宗選將議久不決。延

壽欲以康義誠應選。李崧獨薦石敬瑭。敬瑭陰德之。遣人謂崧曰。爲浮屠者。必合其尖。蓋欲使終始成已事也。後崧事晉。又建議與契丹和親。學士薛文遇。大以爲非。因誦戊昱社稷依明主。安危託婦人之詩以諷之。帝怒。崧惶恐拜無數。

幾得罪。



黃沙風捲半空拋。雲動陰山雪滿郊。探水人回移帳就。射鵬箭落著弓抄。鳥逢霜果饑還啄。馬渡冰河渴自跑。占得高原肥草地。夜深生火折林梢。

崔居儉

居儉唐末進士。仕後唐。累官戶部尙書。

五代史劉昫傳。居儉以祖諱。為太常卿。不肯充禮儀使。改祕書監。遂快快失職。中書舍人李祥為居儉誥詞。有聞名心懼之語。劉昫輒易曰。

有恥且格。居儉訴曰。名諱有令式。予何罪也。聞者皆傳以為笑。

後唐宗廟樂舞辭

艱難王業。返正皇唐。先天再造。卻日重光。漢紹世祖。夏資少康。功成德茂。率祀無疆。

熊皦

皦後唐清泰二年登進士第。延州劉景巖辟為從事。普終商州上津令。有屠龍集。

東觀餘論。劉夢得言八音與政。

通文章與時高下。昔人是之。五季道衰。文喪。當時操筆牘。大率皆哇俚淺下。亂雜無章。其間能遠不忘君。志在憂國。文雖膚近而忠誠可取。若皦者。蓋鮮儷也。余讀其二國音書絕二十篇。及晉末感興諸詩。而悲之。蘇君又出當時集稿示余。雖不脫爾日風範。亦時有佳語。自可傳後無疑。

祖龍詞



平吞六國更何求。童女童男問十洲。滄海不回應悵望。始知徐福解風流。

謫居海上

家臨涇水隔秦川。來往關河路八千。堪恨此身何處老。始皇橋畔又經年。

熊皎

皎。皦弟自稱九華山人。有南金集。

雅言雜載。九華山人熊皎能詩。早行云。山前猶見月。陌上未逢人。山居云。果熟秋先落。禽寒夜未棲。閒居云。深逢野草皆為藥。靜見樵人恐是仙。又云。厭聽啼

鳥夢醒後。慵掃落花春盡時。事文類聚。皎有句云。廢土有人耕不畏。古廳無訟醉何妨。

早梅

江南近臘時。已亞雪中枝。一夜欲開盡。百花猶未知。人情皆共惜。天意欲教遲。莫訝無濃豔。芳筵正好吹。

冬日原居酬光上人見訪

吾道喪已久。吾師何此來。門無塵事閉。卷有國風開。野迴霜先白。庭荒葉自堆。寒暄吟罷後。猶喜話天台。

早行

結束何妨早。將行四顧頻。山前猶見月。陌上未逢人。遠樹動宿鳥。危橋怯病身。漸明恆自慰。應免復迷津。

湘江曉望



笙歌歡罷散離筵。水色朦朧蘸宿烟。山響疎鐘何處寺。火光收釣下灘船。微雲過鳥侵明月。古岸平江浸遠天。歸夢已闌風色動。孤帆仍要住無緣。

遊嵩山

獨背焦桐訪洞天。暫攀靈迹棄塵緣。深逢野草皆疑藥。靜見樵人恐是仙。翠木入雲空自老。古碑橫水莫知年。可憐幽景堪長往。一任人間歲月遷。

九華望廬山

九江山勢盡崢嶸。惟有匡廬最得名。萬壘影遮殘雪在。數峯嵐帶夕陽明。冷侵醉榻鋪秋色。高亞吟龍送水聲。只待丹霄酬志了。白雲深處是歸程。

道傍松

偃蓋當衢莫記年。獨含蒼翠鶴應憐。垂陰獨向笙歌地。有韻自成風雨天。塵□路歧分夜月。燒侵根腳起殘烟。論功只合行人賞。銷得煩蒸古道邊。

月中桂

斷破重輪種者誰。銀蟾何事便相隨。莫言望夜無攀處。卻是吟人有得時。孤影不凋清露滴。異香常在好風吹。幾回目斷雲霄外。未必姮娥惜一枝。

懷三茅道友



塵事何年解客嘲。十年容易到三茅。長思碧洞雲窗下。曾借黃庭雪夜抄。丹桂有心憑至論。五峰無信問深交。杏壇仙侶應相笑。只爲浮名未肯拋。

贈胥尊師

綠髮童顏羽服輕。天台王屋幾經行。雲程去速因風起。酒債還遲待藥成。房閉十洲煙浪闊。籙開三洞鬼神驚。他年華表重歸日。卻恐桑田已變更。

盧士衡

士衡後唐天成二年進士。

靈溪老松歌

靈溪古觀壇西角。千尺鱗皴棟梁樸。橫出一枝戛樓閣。直上一枝掃寥廓。白石蒼苔擁根腳。月明風撼寒光落。有時風雨晦暝擺。撼若黑龍之騰躍。合生於象外峯巒。枉滯乎人間山岳。安得巨靈受請託。拔向青桂白榆邊安著。

再遊紫陽洞重題小松

仙家種此充朝食。葉葉枝枝造化力。去年見時似鶴高。今年蕭騷八九尺。不同矮檜終委地。定向晴空倚天碧。好期逸士統貞根。昂枝點破秋苔色。尋思凡眼重花開。寧知此木超塵埃。祇是十年五年間。堪作大



松

雲外千尋好性靈。伴杉陪柏事孤貞。招呼暑氣終無分。應和涼風別有聲。細雨灑時花旋落。道人食處葉重生。如逢郢匠垂搜採。爲棟爲梁力不輕。

遊靈溪觀

雲藏寶殿風塵外。粉壁松軒入看初。話久仙童顏色老。病來元鶴羽毛疎。樵夫接引尋紅朮。道士留連說紫書。不爲壯心降未得。便堪從此翫清虛。

寄天台道友

相思遙指玉霄峰。悵望江山阻萬重。曾隔曉窗聞法鼓。幾同寒榻聽疎鐘。別來知子長餐柏。吟處將誰對倚松。且住人間行聖教。莫思天路便登龍。

花落

迎風嘯未已。和雨落穀穀。千枝與萬枝。不如一竿竹。

鍾陵鐵柱

千年埋沒竟何爲。變化宜將萬物齊。安得風湖借方便。鑄成神劍斬鯨鯢。

僧房聽雨

古寺松軒雨聲別。寒窗聽久詩魔發。記得年前在赤城。石樓夢覺三更雪。



題牡丹

萬葉紅綃剪盡春。丹青任寫不如真。風光九十無多日。難惜尊前折贈人。

于鄴

鄴武陵人。唐末進士。唐明宗時。官工部郎中。

詩話。後唐明宗時。工部尚書盧文紀。與宰相崔協有隙。協除鄴工部郎中。文紀以鄴與其父嗣業名同音。鄴赴參文紀不見。鄴

因醉忿。自經死。文紀坐貶官。又按全唐詩有鄴下第。下勝其忿。題路左佛廟。

詩云。雀兒未逐颺風高。下視雁鷗意氣豪。自謂能生千里足。黃昏依舊委蓬蒿。

秋夕聞雁

星漢欲沈盡。誰家砧未休。忽聞涼雁至。如報杜陵秋。千樹又黃葉。幾人新白頭。洞庭今夜客。一半卻登舟。

歲暮還家

東西流不駐。白日與車輪。殘雪半成水。微風應欲春。幾經他國歲。已減故鄉人。回首長安道。十年空苦辛。

褒中即事

風吹殘雨歇。雲去有烟霞。南浦足遊女。綠蘋應發花。遠鐘當半夜。明月入千家。不作故鄉夢。始知京洛賒。

塗中作

西南千里程。處處有車聲。若使地無利。始應人不營。天涯猶馬到。石跡尚塵生。如此未曾息。蜀山終冀平。

題華山麻處士所居



貴賤各擾擾。皆逢朝市間。到此無馬跡。始知君獨閑。冰破聽敷水。雪晴看華山。西風寂寥地。唯我坐忘還。  
古來味天南。懷故人。獨行千里塵。軋軋轉征輪。一別已多日。總看成老人。洞庭雪不下。故國草應春。三月烟波暖。南風生綠蘋。  
春至始青青。香車碾已平。不知山下處。來向路傍生。每歲有人在。何時無馬行。應隨塵與土。吹滿洛陽城。  
負郭有田在。年年長廢耕。欲磨秋鏡淨。恐見白頭生。未作一句別。已過千里程。不知書與劍。十載兩無成。  
東風吹草色。空使客蹉跎。不設太平險。更應遊子多。幾傷行處淚。一曲醉中歌。盡向青門外。東隨渭水波。  
遊中梁山  
僻地好泉石。何人曾陸沈。不知青嶂外。更有白雲深。因此見喬木。幾回思舊林。殷勤猿與鳥。唯我獨何心。  
尋山  
到此絕車輪。萋萋草樹春。青山如有利。白石亦成塵。水闊應無路。松深不見人。如知巢與許。千載迹猶新。  
宿江口  
南渡人來絕。喧喧雁滿沙。自生江上月。長有客思家。半夜下霜岸。北風吹荻花。自驚歸夢斷。不得到天涯。



斜谷道

亂峯連疊嶂。千里綠峨峨。蜀國路如此。遊人車亦過。遠烟當驛斂。驟雨逐風多。獨憶紫芝叟。臨風歌舊歌。

過百牢關貽舟中者

蜀國少平地。方思京洛間。遠爲千里客。來度百牢關。帆影清江水。鈴聲碧草山。不因名與利。爾我各應閑。

客中覽鏡

何當開此鏡。卽見髮如絲。白日急於水。少年能幾時。每逢芳草處。長返故園遲。所以多爲客。蹉跎欲怨誰。

長安逢隱者

征車千里至。碾遍六街塵。向此有營地。忽逢無事人。昔時顏未改。浮世路多新。且脫衣沽酒。終南山欲春。

贈王道士

日日市朝路。何時無苦辛。不隨丹竈客。終作白頭人。浮世度千載。桃源方一春。歸來華表上。應笑北邙塵。

友人亭松

俛仰不能去。如逢舊友同。曾因春雪散。見在華山中。何處有明月。訪君聽遠風。相將歸未得。各占石巖東。

過洛陽城

古來利與名。俱在洛陽城。九陌鼓初起。萬車輪已行。周秦時幾變。伊洛水猶清。二月中橋路。烏啼春草生。

客中月



離家凡幾宵。一望一寥寥。新魄又將滿。故鄉應漸遙。獨臨彭蠡水。遠憶洛陽橋。更有乘舟客。悽然亦駐橈。  
友人南遊不回因而有寄

相思春樹綠。千里亦依依。鄴杜月頻滿。瀟湘人未歸。桂花風半落。煙草蝶雙飛。一別無消息。水南車跡稀。

長信宮

簾涼秋氣初。長信恨何如。拂黛月生指。解鬢雲滿梳。一從悲畫扇。幾度泣前魚。坐聽南宮樂。涼風搖翠裾。  
一失輦前恩。綺羅生暗塵。惟應深夜月。獨伴向隅人。長信翠蛾老。昭陽紅粉新。君心似秋節。不使草長春。

東門路

東門車馬路。此路在浮沈。白日若不落。紅塵應更深。從來名利地。皆起是非心。所以青青草。年年生漢陰。

南遊

窮秋幾日雨。處處生蒼苔。舊國寄書後。涼天方雁來。露繁山草溼。洲暖水花開。去盡同行客。一帆猶未回。

夜泊湘江

北風吹楚樹。此地獨先秋。何事屈原恨。不隨湘水流。涼天生片月。竟夕伴孤舟。一作南行客。無成空白頭。

夜尋僧不遇

數歇度烟水。漸非塵俗間。泉聲入秋寺。月色遍寒山。石路幾回雪。竹房猶閉關。不知雙樹客。何處與雲閑。

贈王隱者山居



石室掃無塵。人寰與此分。飛來南浦樹。半是華山雲。浮世幾多事。先生應不聞。寒山滿西日。空照雁成羣。

寄北客

窮邊足風慘。何處醉樓臺。家去幾千里。月圓十二回。寒阡隨日遠。雪路向城開。遊子久無信。年年空雁來。

夜與故人別

白日去難駐。故人非舊容。今宵一別後。何處更相逢。過楚水千里。到秦山幾重。語來天又晚。月落滿城鐘。

過侯王故第

過此一酸辛。行人淚有痕。獨殘新碧樹。猶擁舊朱門。歌歇雲初散。簷空燕尚存。不知彈鋏客。何處感新恩。

孤雲

南北各萬里。有雲心更閑。因風離海上。伴月到人間。洛浦少高樹。長安無舊山。裴回不可駐。漠漠又空還。

遠水

悔作望南浦。望中生遠愁。因知人易老。爲有水東流。欲附故鄉信。不逢歸客舟。萋萋兩岸草。又度一年秋。

感情

青山長寂寞。南望獨高歌。四海故人盡。九原新壠多。西沈浮世日。東注逝川波。不使年華駐。此生能幾何。

洛中有懷

潺潺伊洛河。寂寞少恩波。鑾駕久不幸。洛陽春草多。



十年送魏山韋處士  
陰陰亭際間相顧慘離顏  
一片雲飛去嵯峨空魏山

長信宮

莫問古宮名古宮空有城  
惟應東去水不改舊時聲

高樓

遠天明月出照此誰家樓  
上有羅衣裳涼風吹不休

高輦

輦後唐秦王從榮府諮議參軍

五代史輦與秦王最厚後王敗馮道欲次等原減朱宏昭爭以為不可於是論高輦死

棋

對客圍棋坐搯頤向暮秋  
不言如守默設計似平讐  
決勝雖關勇防危亦合憂  
看他終日局白卻少年頭

韓昭裔

昭裔後唐清泰時同中書門下平章事

五代詩話時清泰帝以宰相李愚等無所事目曰此粥飯僧爾故昭裔詩云云

與李專美

昭裔登庸汝未登鳳池雞樹冷如冰  
何如且作宣徽使免被人呼粥飯僧



張仁溥

仁溥後唐大寧縣丞

題龍窩洞

折花攜酒看龍窩。鏤玉長旌俊彥過。他日各為雲外客。碧紗籠卻又如何。

楊凝式

凝式字景度。宰相涉之子。昭宗朝登進士第。仕後唐。後官至太子太保。歷事至晉漢周卒。

蔡觀天詩

話凝式仕後唐。以後在晉漢間。落魄不自檢。自號楊風子。終能以智自完。書法高妙。傑出五代。可與顏柳繼軌。今洛中僧寺尚多遺跡。題華嚴院一詩云。院似禪心靜。花如覺性圓。自然知了義。爭肯學神仙。用筆尤奔放奇逸。李西臺建中平生師凝式書。題詩於旁曰。枯杉倒檜霜天老。松烟麝煤陰雨寒。我亦生來有書癖。一回入寺一回看。西臺書亦自深穩老健。前輩所貴重也。玉堂嘉話曰。楊凝式小字詩字虛白。五代時人號希維居士。又曰關西老人。游宦紀聞。凝式詩什多雜以恢諧。少從張全義辟。故作詩紀全義之德云。洛陽風景實堪哀。昔日曾為瓦子堆。不是我公重葺理。至今猶自一堆灰。石晉時張從恩尹洛。凝式自汴還。時飛蝗蔽日。凝式以詩寄從恩云。押引蝗虫到洛京。何消郡守遠相迎。從恩弗怪也。然凝式詩句自佳。有院似禪心靜。花如覺性圓。清句也。全唐詩凝式有雪晴詩云。春來冰未泮。冬至雪初晴。為報方居士。豐年瑞已成。

題懷素酒狂帖後

十年揮素學臨池。始識王公學衛非。草聖未須因酒發。筆端應解化龍飛。



馮吉

吉字少吉。馮道之子。官至少卿。

玉壺清話。吉浮薄無檢。善琵琶。妙音出樂府。世無及者。父酷戒之。略不少悛。一日家宴。欲辱之。處賤伶之列。衆執器立于庭。奏數曲罷。例以纏頭。縑繒隨衆伶給之。

吉置縑繒于左肩。抱琵琶。按膝長跪。厲聲呼謝而退。家人大笑於箔。迴首謂父曰。能為吉進此技于天子否。凡賓僚飲聚。長為不速。酒酣即彈。彈罷起舞。舞罷作詩。昂然而去。自謂曰馮三絕。洛陽舊聞。楊少卿凝式。既不大用。佯狂自穢。游寺觀。遇水竹幽勝之地。吟咏忘歸。牆壁之上。筆跡殆徧。馮道子少卿吉頤云云。

題楊少卿凝式書跡

少卿真跡滿僧居。祗恐鍾王也不如。為報遠公須愛惜。此書書後更無書。

唐朝美

朝美。莊宗時伶人。

咏橘

清異錄。莊宗小酌。進新橘。命諸伶咏之。唐朝美詩先成云云。帝大笑。賜所御軟金杯。

金香大丞相。兄弟八九人。剝皮去滓子。若箇是汝身。



張仁德

仁德後唐大寧縣丞

金香大丞相只領八八八人隊與去者千者商最茂也

新花機

和諫 時美補金如江江帝大英顯

揚 帝具親非京小師並臨命信自知之者

神美非宗和命人

之子昭宗朝登進士第仕後唐後官至太子太保歷事至晉漢周

神神美

少卿員補南都尉恐遺士也不成為罪致公任參計判者書

神神少卿張友善相

神神少卿張友善相 神神少卿張友善相 神神少卿張友善相

神神少卿張友善相 神神少卿張友善相 神神少卿張友善相

神神少卿張友善相 神神少卿張友善相 神神少卿張友善相

神神少卿張友善相 神神少卿張友善相 神神少卿張友善相

神神少卿張友善相 神神少卿張友善相 神神少卿張友善相

神神少卿張友善相 神神少卿張友善相 神神少卿張友善相

神古



# 全五代詩卷十

唐

唐彥謙

彥謙字茂業。晉陽人。累官刺史。有鹿門集。

全唐詩話。彥謙。莒公儉之後。博學多藝。文詞壯麗。詩畫音樂博飲之技無不出於流輩。咸通末。應進士。負才無所屈降。十餘年不第。乾符

未。避亂漢南。中和中。河中王重榮辟為從事。累表為副。歷晉絳二州刺史。後重榮與中使田令孜有隙。以王處存代鎮。命李克用護之。克用反。以兵助重榮討田令孜。與朱全忠。重榮軍亂。貶漢中掾曹。節度楊守亮復署為判官。累表為副。歷閬壁二州刺史。彥謙詩尤工。七言少。師溫庭筠。故體格類之。自號鹿門先生。宋楊文公嗜其集。手書自隨。嘗謂其得義山清峭感愴之一體。北夢瑣言。李巨川有筆述。歷舉不第。先以仕偽襄王。與唐彥謙俱貶於南山。褒帥楊守亮優待之。山南失守。隨致士。楊軍容復恭與守亮同奔。北投太原。導行者引出華州。復恭為韓建挫辱。楊罵為奴。以短褐蒙之。斃於枯木。守亮檻送至京。斬於獨柳樹。京城百姓莫不沾涕。李克用為申訴冤。此即南山一丈黑。本姓訾。黃巢時多救護。導引朝士。令趨行在。人有逃黃巢而投附。皆濟之。由是人多感激也。紀事。彥謙即陶穀之祖。穀避晉祖嫌名。改姓。子孫遂不易。彥謙有奉使岐下。聞唐宏夫行軍為賊所擒。傷而有作云。散卒半隨袁校尉。寡妻休問辟司徒。最工。

感物

騷驥初失羣。亦自矜趨騰。俛仰歲時久。帖然困蚊蠅。豪鯨逸其穴。尺水成滄溟。豈無魚鼈交。望望為所憎。物理有翕張。達人同廢興。幸無怵迫憂。聊復曲吾肱。



魚日出泥沙。空村百金珍。豫章值擁輦。細細供蒸薪。論材何必多。適用卽能神。託交何必深。寡求永相親。鮑叔拙羈魯。張生窮厄陳。茫然扳援際。豈意出風塵。

和陶淵明貧士詩

貧賤如故舊。少壯卽相依。中心不敢厭。但覺少光輝。向來乘時士。亦相能奮飛。一朝權勢歇。欲退無所歸。不如行其素。辛苦奈寒飢。人生繫天運。何用發深悲。我居在窮巷。來往無華軒。辛勤衣食物。出此二畝園。薜鬱朝露。桑柘浮春烟。以茲亂心曲。智計無他奸。擇勝不在奢。興至發清言。相逢樵牧徒。混混誰愚賢。松風四山來。清宵響瑤琴。聽之不能寐。中有怨歎音。旦起繞其樹。硜硜不計尋。清陰可敷席。有酒誰與斟。由來大度士。不受流俗侵。浩歌相倡答。慰此霜雪心。中年涉事熟。欲學唾面婁。逡巡避少年。赴穢不敢訓。旁人吁已甚。自喜計慮周。微勞消厚疚。殘辱勝深憂。從知爲下安。處上反無儔。人生各有志。勇懦從所求。村郊多父老。面垢頭如蓬。我嘗使之年。言語不待工。古來名節士。敢望彭城龔。有叟誚其後。更恨道不同。鄙哉譏譎者。爲隘不爲通。低頭拜野老。負米吾願從。

舟中望紫巖

近山如畫牆。遠山如帚長。我從雲中來。回頭白茫茫。惜去乃爾覺。常時自相忘。相忘豈不佳。遣此懷春傷。



飄灑從何來。衣巾溼微涼。初疑風雨集。冉冉遊塵黃。無歸亦自可。信美非吾鄉。登舟望東雲。猶向帆端翔。

九日遊中溪

悠悠循澗行。磊磊據石坐。林垂短長雲。山綴丹碧顆。蓼花最無數。照水嬌婀娜。何知是節序。風日自清妥。羣童競時新。萬果問蔬蔬。欣然爲之醉。烏帽危不墮。此日山中懷。孟公不如我。

六月十三日上陳微博士

窮居無公憂。私此長夏日。蚊蠅如俗子。正爾相妒嫉。麾驅非吾任。遁避亦無術。惟當俟其定。靜坐萬慮一。

宿田家

落日下遙峯。荒村倦行履。停車息茅店。安寢正鼾睡。忽聞扣門急。云是下鄉隸。公文捧花押。鷹隼駕聲勢。良民懼官府。聽之肝膽碎。阿母出搪塞。老腳走顛躓。小心事延款。倉餘糧復匱。東隣借種雞。西舍覓芳醕。再飯不厭飽。一飲直呼醉。明朝怯見官。苦苦燈前跪。使我不成眠。爲渠滴清淚。民膏日已瘠。民力日愈弊。空懷伊尹心。何補堯舜治。

夏日訪友

堤樹生晝涼。濃陰撲空翠。孤舟喚野渡。村童入幽邃。高軒俯清流。一犬隔花吠。童子立門牆。問我向何處。主人聞故舊。出迎時倒屣。驚迸敝間闊。屈指越寒暑。殷勤爲延款。偶爾得良會。春盤擘紫蝦。冰鯉斫銀膾。荷梗白玉香。苕菜青絲脆。臘酒擊泥封。羅列總新味。移席臨湖濱。對此有佳趣。流連送深杯。賓主共忘醉。



清風岸烏紗。長揖謝君去。事事如浮雲。東西渺煙水。

遊南明山

久聞南明山。共慕南明寺。幾度欲登臨。日逐擾人事。于焉偶閑暇。鳴轡忽相聚。乘興樂遨遊。聊此托佳趣。涉水渡溪南。迢遙翠微裏。石磴千疊斜。峭壁半空起。白雲鎖峰腰。紅葉暗溪嘴。長藤絡虛巖。疎花映寒水。金銀拱梵刹。丹青照廊宇。石梁臥秋溟。風鈴作簷語。深洞結苔陰。嵐氣滴晴雨。羊腸轉咫尺。鳥道轉千里。屈曲到禪房。上人喜延竚。香分宿火薰。茶汲清泉煮。投閑息萬機。三生有宿契。行廚出盤殮。擔甕倒芳醕。脫冠挂長松。白石藉憑倚。宦途勞營營。暫此滌塵慮。鬪令促傳觴。投壺更聯句。興來較勝負。醉後忘爾汝。忽聞吼蒲牢。落日下雲嶼。長嘯出烟蘿。揚鞭賦歸去。

索蝦

姑熟多紫蝦。獨有湖陽優。出產在四時。極美宜於秋。雙箝鼓繁鬚。當頂抽長矛。鞠躬見湯王。封作朱衣侯。所以供盤餐。羅列同珍羞。蒜友日相親。瓜朋時與儔。既名釣詩釣。又作鉤詩鉤。于時同相訪。數日承款留。厭飲多美味。獨此心相投。別來歲云久。馳想空悠悠。銜杯動遐思。嚙口涎空流。封緘托雙鯉。于焉來遠求。慷慨胡隱君。果肯分惠否。

採桑女

春風吹蠶細如蟻。桑芽纔努青鴉嘴。侵晨探采誰家女。手挽長條淚如雨。去歲初眠當此時。今歲春寒葉



放遲愁聽門外催里胥。官家二月收新絲。

詠葡萄

西園晚霽浮嫩涼。開尊漫摘葡萄嘗。滿架高撐紫絡索。一枝斜蹙金琅璫。天風颼颼葉栩栩。蝴蝶聲乾作晴雨。神蛟清夜蟄寒潭。萬片溼雲飛不起。石家美人金谷遊。羅幃翠幕珊瑚鉤。玉盤新薦入華屋。珠帳高懸夜不收。勝遊記得當年景。清氣逼人毛骨冷。笑呼明鏡上遙天。醉倚銀牀弄秋影。

鱉

湖田十月清霜墮。晚稻初香蟹如虎。扳罾拖網取賽多。篋篋挑將水邊貨。縱橫連爪一尺長。秀凝鐵色含湖光。螯螞石蟹已曾食。使我一見驚非常。買之最厭黃髯老。償價十錢尙嫌少。漫誇丰味過蝓蚶。尖臍猶勝團臍好。充盤煮熟堆琳琅。橙膏醬滌調堪嘗。一斗擘開紅玉滿。雙螯嚙出瓊酥香。岸頭沾得泥封酒。細嚼頻斟弗停手。西風張翰苦思鱸。如斯丰味能知否。物之可愛尤可憎。嘗聞取刺於青蠅。無腸公子固稱美。弗使當道禁橫行。

送許戶曹

沙頭小燕鳴春和。楊柳垂絲烟倒拖。將軍樓船發浩歌。雲檣高插天嵯峨。白虹走香傾翠壺。勸飲花前金叵羅。神鰲駕粟升天河。新承雨澤浮恩波。

敘別



譙樓夜促蓮花漏。樹陰搖月蛟螭走。蟠拏對月吸深杯。月府清虛玉兔吼。翠盤擘脯臙脂香。碧碗敲冰分蔗漿。十載番思舊時事。好懷不似當年狂。夜合花香開小院。坐愛涼風吹醉面。酒中彈劍發清歌。白髮年來爲愁變。

梅亭

東海窮詩客。西風古驛亭。髮從殘歲白。山入故鄉青。世事徒三窟。兒曹且一經。丁寧速賒酒。煮栗試砂瓶。

歲除

索索風搜客。沈沈雨洗年。殘林生獵跡。歸鳥避窰烟。節物杯漿外。溪頭鬢影前。行藏都未定。筆硯或能捐。

聞應德茂先離棠溪

落日蘆花雨。行人穀樹村。青山時問路。紅葉自知門。苜蓿窮詩味。芭蕉醉墨痕。端知棄城市。經席許頻溫。

夜坐

愁鬢丁年白。寒燈丙夜青。不眠驚戍鼓。久客厭郵鈴。洶洶城噴海。疎疎屋漏星。十年窮父子。相守慰飄零。

弔方千處士

不比他人死。何詩可挽君。淵明元嬾仕。東野別攻文。滄海諸公淚。青山處士墳。相看莫浪哭。私諡有前聞。

題證道寺

彎環青徑斜。自是野僧家。滿澗洗巖液。插天排石牙。爐寒餘柏子。架靜落藤花。記得逃兵日。門多貴客車。



宿獨留

日晚宿留城。人家半掩門。羣鴉棲老樹。一犬吠荒村。爭買魚添價。新芻酒帶渾。船頭對新月。誰與共清論。

客中感懷

客路三千里。西風兩鬢塵。貪名笑吳起。說國歎蘇秦。託興非耽酒。思家豈爲蓴。可憐今夜月。獨照異鄉人。

過三山寺

三山江上寺。宮殿望蒼蕘。石徑侵高樹。沙灘半種苗。一僧歸晚日。羣鷺宿寒潮。遙聽風鈴語。興亡話六朝。

望夫石

江上見危磯。人形立翠微。妾來終日望。夫去幾時歸。明月空懸鏡。蒼苔漫補衣。可憐雙淚眼。千古斷斜暉。

過湖口

江湖分兩路。此地是通津。雪淨山浮翠。風高浪潑銀。人行俱是客。舟住卽爲隣。俯仰煙波內。蜉蝣寄此身。

登廬山

五老峯巔望。天涯在目前。湘潭浮夜雨。巴蜀暝寒烟。泰華根同時。嵩衡脈共聯。憑虛有仙骨。日月看推遷。

送樊瑄司業歸朝

近者蘇司業。文雄道最光。夫君居太學。妙譽繼中行。汲郡陵初發。汾陰篋久亡。寂寥方倚席。容易忽升堂。去日應懸榻。來時定裂裳。愜心頻拾芥。應手屢穿揚。辯急如無敵。飛騰固自強。論心期舌在。問事畏頭長。



駟馬終題柱。諸生悉面牆。啗螯譏爾雅。賣餅訴公羊。

三國志注。魏嚴幹善春秋公羊。鍾繇好左氏。謂公羊爲賣餅家。

未見泥函谷。俄驚火建章。

烟塵昏象魏。行在隔巴梁。紅粟填郿塢。青袍過壽陽。剪茅行殿溼。伐柏舊陵香。鬢室青衿盡。渠門火旆揚。雲飛同去國。星散各殊方。賤子悲窮轍。當年亦擅場。齋辛尋幼婦。醴酒憶先王。聖域探姬孔。皇風樂禹湯。畏誅輕李喜。言命小臧倉。折樹休盤槩。沈鉤且釣璜。鴻都問詞客。他日莫相忘。

移莎

移從杜城曲。置在小齋東。正是高秋裏。仍兼細雨中。結根方迸竹。疎蔭託高桐。苒苒齊芳草。飄飄笑斷蓬。片時留靜者。一夜響鳴蛩。野露通宵滴。溪烟盡日蒙。試才卑庾薤。求味笑周菘。只此霜栽好。他時贈伯翁。

紅葉

無處不飄揚。高樓臨道旁。素娥前夕月。青女夜來霜。宿雨隨時潤。秋晴著物光。幽懷長若此。病眼更相妨。蜀紙裁深色。燕脂落靚粧。低叢侵小閣。倒影入迴塘。謝眺留霞綺。甘寧棄錦張。何人休遠道。是處有斜陽。薜荔垂書幌。梧桐墜井牀。晚風生旅館。寒籟近僧房。桂綠明淮甸。楓丹照楚鄉。雁疎臨鄆杜。蟬急傍瀟湘。樹異桓宣武。園非顧辟疆。茂陵愁臥客。不自保危腸。

春雨

綺陌夜來雨。春樓寒望迷。遠容迎燕戲。亂響隔鶯啼。有恨開蘭室。無言對李蹊。花欹渾拂檻。柳重欲垂堤。



燈檠昏魚目。薰爐咽麝臍。別輕天北鶴。夢怯汝南雞。入戶侵羅幌。梢簷潤繡題。新豐樹已失。長信草初齊。亂蝶寒猶舞。驚鳥暝不栖。庾郎盤馬地。卻怕有春泥。

漢代

漢代金爲屋。吳宮綺作寮。豔詞傳靜婉。新曲定妖嬈。箭響猶殘夢。籤聲報早朝。鮮明臨曉日。迴轉度春宵。半袖籠清鏡。前絲壓翠翹。靜多如有待。閑極似無憀。梓澤花猶滿。靈和柳未凋。障昏巫峽雨。屏掩浙江潮。未信潘名岳。應疑史姓蕭。漏因歌暫斷。燈爲雨頻挑。飲酒闌三雅。投壺賽百嬌。鈿蟬新翅重。金鴨舊香焦。水淨疑澄練。霞孤欲建標。別隨秦柱促。愁爲蜀弦么。元宴難瘳痺。臨叩但發瘳。聯詩徵弱絮。思友詠甘蕉。王氏憐諸謝。周郎定小喬。黼幃翹綵雉。波扇畫文絳。苕密妨垂釣。荷欹欲度橋。不因衣帶水。誰覺路迢迢。遊陽明洞呈王理得諸君

禹穴蒼茫不可探。人傳靈笈鎖煙嵐。初晴鶴點青邊嶂。欲雨龍移黑處潭。北斗齋壇天寂寂。東風仙洞草毵毵。堪憐尹叟非關吏。猶向江南逐老聃。

新豐

沛中歌舞百餘人。帝業功成里巷新。半夜素靈先哭楚。一星遺火下燒秦。貔貅掃盡無三戶。雞犬歸來識四隣。惆悵故園前事遠。曉風長路起埃塵。拜越公墓因遊定水寺有懷源老



越公已作飛仙去。猶得潭潭好墓田。老樹背風深拓地。野雲依海細分天。青峰曉接鳴鐘寺。玉井秋澄試茗泉。我與源公舊相識。遺言瀟灑有人傳。

晚秋遊中溪

淡竹岡前沙雁飛。小花尖下柘丸肥。山雲不卷雨自薄。天氣欲寒人正歸。招伴祇須新稻酒。臨風猶有舊苔磯。故人舊業依稀在。怪石老松今是非。

寄陳少府兼簡叔高

懷人路絕雲歸海。避俗門深草蔽邱。萬事漸消閑客夢。一年虛白少年頭。山螢啼緩從除架。淮雁來多莫上樓。近日隣家有新釀。每逢詩伴得淹留。

第三溪

日晏霜濃十二月。林疎石瘦第三溪。雲沙有徑縈寒燒。松屋無人聞晝雞。幾聚衣冠埋作土。當年歌舞醉如泥。早知涉世真成夢。不棄山田春雨犁。

蒲津河亭

宿雨清秋霽景激。廣亭高樹向晨興。煙橫博望乘槎水。日上文王避雨陵。孤棹夷猶期獨往。曲闌愁絕每長憑。思鄉懷古多傷別。況此哀吟意不勝。

毘陵道中



百年只有百清明。狼狽今年又避兵。煙火誰開寒食禁。簪裾那復麗人行。禾麻地廢生邊氣。草木春寒起戰聲。渺渺飛鴻天斷處。古來還是闔閭城。

過浩然先生墓

人間萬卷龐眉老。眼見堂堂入草萊。行客須當下馬過。故交誰復裹雞來。山花不語如聽講。溪水無情自薦哀。猶勝黃金買碑碣。百年名字已煙埃。

贈孟德茂

江海悠悠雪欲飛。抱書空出又空歸。沙頭人滿鷗應笑。船上酒香魚正肥。塵土竟成誰計是。山林又悔一年非。平生萬卷應夫子。兩世功名窮布衣。

秋霽豐德寺與元貞師詠月

露冷風輕霽魄圓。高樓更在碧山巔。四溟水合疑無地。八月槎通好上天。黯黯星辰環紫極。喧喧朝市匝青煙。夜深獨與巖僧語。羣動消聲舉世眠。

長陵

長安高闕此安劉。耐葬纍纍盡列侯。豐上舊居無故里。沛中原廟對荒邱。耳聞明主提三尺。眼見愚民盜一坏。千載腐儒騎瘦馬。渭城斜月重回頭。

金陵九日



野菊西風滿路香。雨花臺上集壺觴。九重天近瞻鍾阜。五色雲中望建章。綠酒莫辭今日醉。黃金難買少年狂。清歌驚起南飛雁。散作秋聲送夕陽。

遊清涼寺

白雲紅樹路紆縈。古殿長廊次第行。南望水連桃葉渡。北來山枕石頭城。一塵不到心源淨。萬有俱空眼界清。竹院逢僧舊曾識。旋披禪衲爲相迎。

高平九日

雲淨南山紫翠浮。憑陵絕頂望悠悠。偶逢佳節牽詩興。漫把芳尊遣客愁。霜染鴉楓迎日醉。寒衝涇水帶冰流。烏紗頻岸西風裏。笑插黃花滿鬢秋。

興元沈氏莊

清淺縈紆一水間。竹岡藤樹小躋攀。露沾荒草行人過。月上高林宿鳥還。江遶武侯籌筆地。雨昏張載勒銘山。異鄉一笑因酣醉。忘卻愁來鬢髮斑。

寄懷

有客傷春復怨離。夕陽亭畔草青時。淚隨紅蠟無由制。腸比朱弦恐更危。梅向好風惟是笑。柳因微雨不勝垂。雙溪未去饒歸夢。夜夜孤眠枕獨欹。

東韋曲野思



淡霧輕雲匝四垂。綠塘秋望獨顰眉。野蓮墮水無人見。寒鷺窺魚共影知。九陌要津勞日擊。五湖閑夢誘心期。孤燈夜夜愁欹枕。一覺滄州似昔時。

鷓鴣

一宿南塘煙雨時。好風搖動綠波微。驚離曉岸衝花去。暖下春汀照影飛。華屋撚弦彈鼓舞。綺窗含筆澹毛衣。畫屏見後長迴首。爭得雕籠莫放歸。

螢

日下蕪城莽蒼中。溼螢撩亂起衰叢。寒烟陳后長門閉。夜雨隋家舊苑空。星散欲陵前檻月。影低如試北窗風。羈人此夕方愁緒。心似寒灰首似蓬。

夜蟬

翠竹高梧夾後溪。勁風危露雨淒淒。那知北牖殘燈暗。又送西樓片月低。清夜更長應未已。遠烟尋斷莫頻嘶。羈人此夕如三歲。不整寒衾待曙雞。

七夕

露白風清夜向晨。小星垂佩月埋輪。絳河浪淺休相隔。滄海波深尙作塵。天外鳳皇何寂寞。世間烏鵲漫辛勤。倚闌殿北斜樓上。多少通宵不寐人。

中秋夜玩月



一夜高樓萬景奇。碧天無際水無涯。只留皎月當層漢。並送浮雲出四維。霧靜不容元豹隱。冰生惟恐夏蟲疑。坐來離思憂將曉。爭得嫦娥仔細知。

牡丹

真宰多情巧思新。固將能事送殘春。爲雲爲雨徒虛語。傾國傾城不在人。開日綺霞應失色。落時青帝合傷神。嫦娥婺女曾相送。留下鷓鴣黃作麩塵。

離鸞

聞道離鸞思故鄉。也知情願嫁王昌。塵埃一別楊朱路。風月三年宋玉牆。下疾不成雙點淚。斷多難到九迴腸。庭前佳樹名梔子。試結同心寄謝娘。

柳

春思春愁一萬枝。遠村遙岸寄相思。西園有雨和苔長。南內無人拂檻垂。遊客寂寥緘遠恨。暮鶯啼叫惜芳時。晚來飛絮如霜鬢。恐爲多情管別離。

湘妃廟

劉表荒碑斷水濱。廟前幽草閉殘春。已將愁淚留班竹。又感悲風入白蘋。八族未來誰北拱。四凶猶在莫南巡。九峰相似堪疑處。望見蒼梧不見人。

葡萄



金谷風露涼。綠珠醉初醒。珠帳夜不收。月明墮清影。

春草

隨夢入池塘。無心在金谷。春風自年年。吹遍天涯綠。

文惠宮人

認得前家令。宮人淚滿裾。不知梁佐命。全是沈尙書。

春日偶成

築箏簫管和琵琶。興滿金尊酒量賒。歌舞留春春似海。美人顏色正如花。

詠馬二首

紫雲團影電飛瞳。駿骨龍媒自不同。騎過玉樓金轡響。一聲嘶斷落花風。

詠竹

醉臥涼陰沁骨清。石牀冰簟夢難成。月明午夜生虛籟。悞聽風聲是雨聲。

無題

錦箏銀甲響鶉弦。勾引春聲上綺筵。醉倚闌干花下月。犀梳斜墮鬢雲邊。漏滴銅龍已夜深。柳梢斜月弄疎陰。滿園芳草年年恨。剔盡燈花夜夜心。夜合庭前花正開。輕羅小扇爲誰裁。多情驚起雙蝴蝶。飛入巫山夢裏來。



垂柳

絆惹春風別有情。世間誰敢鬪輕盈。楚王江畔無端種。餓損纖腰學不成。

曲江春望

杏豔桃光奪晚霞。樂遊無廟有年華。漢朝冠蓋皆陵墓。十里宜春漢苑花。

羅江驛

數枝高柳帶鳴鴉。一樹山榴自落花。已是向來多淚眼。短亭回首在天涯。

仲山

千載遺蹤寄薜蘿。沛中鄉里舊山河。長陵亦是閑邱隴。異日誰知與仲多。

克復後登安國寺閣

千門萬戶鞠蒿藜。斷燼遺垣一望迷。惆悵建章鴛瓦盡。夜來空見玉繩低。

長溪秋望

柳短莎長溪水流。雨微烟暝立溪頭。寒鴉閃閃前山去。杜曲黃昏獨自愁。

韋曲

欲寫愁腸愧不才。多情練漉已低摧。窮郊二月初離別。獨傍寒村嗅野梅。



贊華遼太祖長子名倍小字突欲聰敏好學嘗市書萬卷藏醫巫閭絕頂之望海堂能詩畫兼精技術奔唐明宗賜姓名後為廢帝所害

北夢瑣言莊宗夫人夏氏最承恩寵後嫁契丹突欲名李贊葉所謂東丹王即阿保機長子先歸朝後除滑州節度使性酷毒侍婢微過

即以刀割火灼夏氏少長宮掖不忍其兇求離婚歸河陽節度夏魯奇家今為尼遼史突欲初為太子以

### 立木海上刻詩

小山壓大山大山全無力羞見故鄉人從此投外國

### 程紫霄

紫霄唐末道士後唐同光初嘗勅令入內殿講論避暑錄云道家言人身中有三尸亦云三彭記人過失庚申日乘人睡告之上帝學道者是日不睡謂守庚申唐末

朝士會終南太極觀守庚申紫霄笑曰此吾師托是以懼為惡者爾據牀求枕作詩示衆投筆鼻息如雷

### 示衆

不守庚申亦不疑此心常與道相依玉皇已自知行止任汝三彭說是非

### 吳涵虛

涵虛字含靈江西人出家為道士居南岳

全唐詩話涵虛俗呼為吳揉好睡經旬不飲食常言曰人若要閑即須懶好勤即不閑也唐廢帝清泰年羽化宋乾祐中有人於嵩



山見之

上昇歌

玉皇有詔登仙職。龍吐雲兮鳳著力。眼前驀地見樓臺。異草奇花不可識。我向大羅觀世界。世界即如指掌大。當時不為上昇忙。一時提向瀛洲賣。

可止

止姓馬氏。范陽房山人。長近體律詩。乾寧中賜紫。後唐明宗令住持洛京長壽寺。署號文智大師。有三山集。全唐詩話高僧傳中山節度王處直座詠白鵲時諸侯兼并王欲繼好息民故可止詩云不知誰會喃喃語必向王前報太平

山居

雪消春力展。花漫洞門垂。果長纖枝曲。巖崩直道移。重猿園淺井。鬪鼠下疎籬。寒食微燈在。高風勢徹陂。

贈樊川長老

瘦顏顴骨見。滿面雪毫垂。坐石鳥疑死。出門人謂癡。照身潭入楚。浸影檜生隋。太白曾經夏。清風涼四肢。

送僧

四海無拘繫。行心興自濃。百年三事衲。萬里一枝筇。夜減當時影。春消過雪蹤。白雲深處去。知宿在何峰。

哭賈島



燕生松雪地蜀死墓山根詩僻降今古官卑悞子孫塚欄寒月色人哭苦吟魂墓雨滴碑字年年添蘚痕  
雪十二韻

落處咸過尺。翛然物象淒。瑞凝金殿上。寒甚玉關西。潤比江河普。明將日月齊。凌雲花頂膩。鎖徑竹梢低。出谷樵童怯。歸林野鳥迷。煮茶融破練。磨墨染成縈。陷兔埋平澤。和魚凍合溪。入樓消酒力。當檻寫詩題。道路依憑馬。朝昏委托雞。洞深猿作族。松亞鶴移棲。及夏清巖穴。經春溜石梯。豐年兼泰國。天道育黔黎。

### 馮道幕客

題酒戶修孔廟狀

道鎮南陽郡中宣聖廟壞有酒戶十餘輩投狀乞修道未及判有幕客題狀後云云道遽罷其請出已俸重修

槐影參差覆杏壇。儒門子弟盡高官。卻教酒戶重修廟。覓我慚惶也不難。

### 鍾傳客

占歷日包橘

傳領江西日客以覆射之法求見傳以歷日包橘置袖中令射客云

太歲當頭坐。諸神不敢當。其中有一物。常帶洞庭香。

### 楊苧蘿

苧蘿洛陽歌妓

全唐詩話苧蘿聰慧有才思楊凝式甚憐之時有講經僧雲辨在座忽檐前蜘蛛垂絲而下正對苧蘿與僧前楊笑謂苧蘿試嘲得著師奉絹五匹苧蘿應聲成辨體充肚大故云楊見詩絕倒大叫和尚將



絹來辨慙且  
笑奉之如數

詠垂絲蜘蛛

喫得肚嬰撐。尋思繞寺行。空中設羅網。只待殺衆生。

京兆女子

女子姓氏未詳

題興元明珠亭

寂寥滿地落花紅。獨有離人萬恨中。回首池塘更無語。手彈珠淚背東風。

姊妹三人

光、威、哀、唐末  
人失其姓

聯句

朱樓影直日當午。玉樹陰低月已三。光膩粉暗銷金鏤合。錯刀閑翦泥金衫。威繡牀怕引烏龍吠。錦字愁教青鳥銜。哀百味鍊來憐益母。千花開處鬪宜男。光鴛央有伴誰能羨。鸚鵡無言我自慚。威浪喜游蜂飛撲撲。佯驚孤燕語喃喃。哀偏憐舜數蠃蟻掌。每憶光抽玳瑁簪。光煙洞幾年悲尙在。星橋一夕帳空含。威窗前恃節羞虛擲。世上風流笑苦諳。哀獨結香綃偷餉送。暗垂檀袖學通參。光須知化石心難定。卻是爲



雲分易甘威看見風光零落盡。弦聲猶逐望江南。哀

### 清泰三年歌

先是甲子歌有此。後清泰三年丙申。大軍於太原南五樓村前。大戰至九月。晉祖勾契丹。至於城下。王師敗績。至十一月。戎王遣蕃軍送晉祖洛陽。即胡虜亂中原之應也。

丙申年。數在五樓前。但看八九月。胡虜亂中原。

### 後唐軍士謠

除去菩薩。扶立生鐵。

潞王之入洛。許賞軍士錢百緡。後不能給。賞錢二十緡。軍士猶怨望。乃為此謠。以閔帝仁弱。潞王剛嚴。有悔心故也。

### 後唐宗廟樂舞辭

唐餘錄。後唐並用唐樂。無所變更。惟別造六室舞辭。懿祖室奏昭德之舞。獻祖室奏文明之舞。太祖室奏應天之舞。昭宗室奏永平之舞。莊宗室奏武成之舞。明宗室奏雍熙之舞。

### 昭德舞

懿彼明德。赫赫煌煌。名高闔域。功著旂常。道符休泰。運叶祺祥。慶傳萬祀。以播耿光。

### 文明舞

常業光揚。皇圖翕赫。聖德孔彰。神功不測。信及遯魚。恩霑動植。懿範鴻名。傳之萬億。

### 應天舞

晉國肇興。雄圖再固。黼黻帝道。金玉王度。皇天無親。惟德是輔。載誕英明。永光聖祚。

### 永平舞



慶傳瓚祚位正瑤圖功宣四海化被八區靜彰帝道動合乾符千秋萬祀永荷昭蘇

謝天機

文開

謝

謝

謝

謝

謝

謝

謝



全五代詩卷十一

晉

和凝

凝字成績。鄆州須昌人。舉進士。初仕後唐。天成中。歷翰林學士。知貢舉。晉天福五年。拜中書侍

郎。同門下平章事。入漢。拜太子太傅。封魯國公。有紅葉稿。

北夢瑣言。和凝少年時。好為曲子詞。布于沛洛。洎入相。專托人收拾焚燬。然相公厚重有德。終

為豔詞所玷。契丹入夷門。號為曲子相公。樂書。凝為文以多為富。有集百卷。自鏤板以行。識者非之曰。此顏之推所謂

論凝符也。和凝有採蓮曲云。波上人如潘玉兒。掌中花似趙飛燕。人傳誦之。香奩集和魯公之詞也。後貴。乃嫁其名于

韓偓。凝平生著述。分為演論。游藝。孝悌。疑獄。香奩。金藏六集。避議論。諱其名。又欲後人知。故游藝集詩中實之。此凝意也。

予在秀州。其會孫和惇家藏諸書。皆魯公故物。未有印記甚完。談賓錄。曲子相公。晉和凝也。判詩博士。五代王仁裕也。

秦婦吟秀才。蜀相章莊也。五代周張昭遠好學。積萬卷。號書樓張家。五代蔣維東好學。能屬文。隱居衡岳。從而受業者。號

山長。五代唐帝謂史虛白曰。真處士風月主人。蜀歐陽彬也。皂江漁翁。蜀張立也。南漢劉龔才人蘇氏。通經史。宮中呼為

蘇大家。蜀黃崇

嘏。號女狀元。

解紅歌

百戲能。五音清。解紅一曲新。教成兩個瑤池小仙子。此時奪卻柘枝名。



漁父歌

白芷汀寒立鷺鷥。蘋風輕翦浪花時。烟霧霧。日遲遲。香引芙蓉惹釣絲。

題鷹獵兔畫

雖是丹青物。沈吟亦可傷。君誇鷹眼疾。我憫兔心忙。豈動騷人興。惟增獵客狂。鮫綃百餘尺。爭及製衣裳。

醴泉院

萬山嵐靄簇洋城。數處禪齋盡有名。古柏八株堆翠色。靈泉一派逗寒聲。暫遊頗愛閑滋味。久住翻嫌俗性情。珍重支公每相勉。我于儒行也修行。

宮詞百首

紫燎光銷大駕歸。御樓初見赭黃衣。千聲鼓定將宣赦。竿上金雞翅欲飛。北闕晴分五鳳樓。嵩山秀色護神州。洛河自契千年運。更擬波中出九疇。中興殿上曉光融。一炷天香舞瑞風。百辟虔心齊稽首。捲簾遙見御衣紅。日和風暖御樓時。萬姓齊瞻八彩眉。瑞氣祥烟籠細仗。閣門宣赦四方知。鳳吹鸞歌曉日明。豐年觀稼出神京。封人爭獻南山壽。五色雲中御輦平。聖主臨軒待曉時。穿花宮漏正遲遲。雞人一唱乾坤曉。百辟分班嚴羽儀。朦朧夜月照池亭。初夜椒房掩畫屏。宮女相呼有何事。上樓同看老人星。



紅泥椒殿綴珠璫。帳蹙金龍宰地長。紅獸慢然天色暖。鳳爐時復爇沉香。  
九重樓殿簇丹青。高柳含烟覆井亭。宮內不知今日幾。自來階下數堯堯。  
寢殿香濃玉漏嚴。雲隨涼月下西南。帳前宮女低聲道。主上還應夢傅巖。  
遶殿鉤闌壓玉階。內人輕語凭蔥臺。皆言明主垂衣理。不假朱雲傍檻來。  
顛預冰面瑩池心。風刮瑤堦臘雪深。怪得宮中無獸炭。步搖釵是辟寒金。  
蘭殿春融自艷笙。玉顏風透象紗明。金簧如語鶯聲滑。可使雲和獨得名。  
蘭燭時將鳳髓添。寒星遙映夜光簾。龍樓露著鴛鴦瓦。誰近螭頭擲玉籤。  
玉甃蓮池春水平。小魚雙並錦鱗行。內中知是黃河樣。九曲今年徹底清。  
真珠簾外靜無塵。耿耿涼天景象新。金殿夜深銀燭晃。宮嬪來奏月重輪。  
魚犀月掌夜通頭。自著盤鶯錦臂鞦。多把沉香配龍麝。宮中掌浸十香油。  
香雲雙颭玉蟬輕。侍從君王苑裏行。嘉瑞忽逢連理木。一時跪拜賀文明。  
金鸞雙立紫檀槽。暖殿無風韻自高。含笑試彈紅藥調。君王宣賜酪櫻桃。  
斑簾如霞可殿鋪。更開新進瑞蓮圖。誰人築損珊瑚架。子細看時認瀝蘇。  
金盆初曉洗纖纖。銀鴨香焦特地添。出戶忽看春雪下。六宮齊捲水晶簾。  
暖金盤裏點酥山。擬望君王子細看。更向眉中分曉黛。巖邊染出碧琅玕。



雲母屏前繡柱衣。龍牀閑卷諫書幃。黃金檻外螭頭活。日照紅蘭露未晞。  
樓西殘月尙朧明。中禁雞人報曉聲。清旦司天臺進狀。夜來晴霽泰階平。  
織轡摩軒響佩環。銀臺門外集鴛鸞。三鐘五鼓祥烟斂。日照仙人捧露盤。  
司膳廚中也禁烟。春宮相對畫秋千。清明節日頒新火。蠟炬星飛下九天。  
宮木交芳色盡深。和風輕舞早鶯吟。侍臣不異東方朔。應喜仙桃滿禁林。  
貢橘香勻醖醖容。星光初滿小金籠。近臣押賜諸王宅。拜了方開敕字封。  
獻壽朝元欲偃戈。航深梯險競駢羅。若論萬國來朝日。比並塗山更較多。  
豔陽風景簇神州。杏葉桃心照鳳樓。遙望青青河畔草。幾多歸馬與休牛。  
鑾輿觀稼晚方歸。日月旗中見御衣。萬姓焚香惟頂禮。瑞雲隨繖入宮闈。  
宮庭皆應紫微垣。壯麗宸居顯至尊。赤子顛顛瞻父母。已將仁德比乾坤。  
三農皆已闢田疇。又見金門出土牛。塊雨條風符聖化。嘉禾看卻報新秋。  
進食門前水陸陳。大官齋潔貢時新。明君宵旰分甘處。便索金盤賜重臣。  
層臺金碧惹紅霞。仙掌亭亭對月華。昨夜盤中甘露滿。婕妤好爭去奏官家。  
水殿垂簾冷色凝。一牀珍簟展春冰。才人侍立持團扇。金縷雙龍貼碧藤。  
香鴨烟輕蕪水沈。雲鬢閑墜鳳犀簪。珠簾半捲開花雨。又見芭蕉展半心。



鶯錦蟬羅撒麝臍。狡狴輕噴瑞烟迷。紅酥點得香山小。卷上珠簾日未西。  
錦褥花明滿殿鋪。宮娥分坐學樗蒲。欲教官馬衝關過。咒願纖纖早擲盧。  
小樓花簇鈿山低。金雉雙來踢馬齊。誇向傍人能彩戲。朝來贏得鷺鷥犀。  
紅鬃白馬嬾龍飛。天廐供來入紫微。遙見玉階嘶不已。應緣認得赭黃衣。  
班定千牛立受宣。佩刀搢笏鳳墀前。一聲不坐祥雲合。鴛鴦依行拜兩邊。  
三殿香濃曉色來。祥鸞威鳳待門開。鏘金佩玉趨丹陛。總是和羹作礪才。  
兩番供奉打毬時。鸞鳳分廂錦繡衣。虎驟龍騰宮殿響。驂騑爭趁一星飛。  
鳳池冰泮岸莎勻。柳眼花心雪裏新。都是九重和暖地。東風先報禁園春。  
紫氣氤氳滿帝都。映樓明月鎖金鋪。銀泥殿裏嫌紅燭。教近龍牀著火珠。  
地衣初展瑞霞融。繡帽金鈴舞舜風。吹竹彈絲珠殿響。墜仙雙降五雲中。  
錦策勻鋪寒玉齊。星鎚高運日通犀。鏗金曲罷春冰碎。跪拜君王粉面低。  
珠簾靜卷水亭涼。玉蘂風飄小檻香。幾處按歌齊入破。雙雙雛燕出宮牆。  
宮娥解禊豔陽時。鷁舸蘭橈滿鳳池。春水如藍垂柳醉。和風無力裊金絲。  
白玉階前菊蕊香。金盃仙醞賞重陽。層臺雲集梨園樂。獻壽聲聲祝萬康。  
天籟吟風社燕歸。渚蓮香老碧苔肥。夜來霜墜梧桐葉。諸殿平明進御衣。



鑪爇香檀獸炭癡。眞珠簾外雪花飛。六宮進酒堯眉壽。舞鳳盤龍滿御衣。  
雲行風靜早秋天。競遶盆池踢采蓮。罨畫披袍從宰地。更尋宮柳看鳴蟬。  
闌珊星斗綴珠光。七夕宮嬪乞巧忙。總上穿針樓上去。競看銀漢灑瓊漿。  
寶瑟淒鏘夜漏餘。玉階閑坐對蟾蜍。秋光寂歷銀河轉。已見宮花露滴疎。  
春風金裏萬年枝。簇白團紅爛熳時。宮女競思遊御苑。大家齊奏聖人知。  
乾文初見泰階平。日月常遵閣道行。昨夜仰觀垂象正。拱辰星宿轉分明。  
鏘鏘濟濟赴延英。漸近重瞳目轉明。君聖臣賢魚水契。鴻基須賀永清平。  
天廡驂駢集嫩龍。雪光相照曉嘶風。昂頭步步金鞍穩。掌扇花前御路中。  
金吾細仗儼威儀。聖旨凝旒對遠夷。曉日曈曨瞻玉案。丁冬環珮滿彤墀。  
正旦垂旒御八方。蠻夷無不奉梯航。羣臣舞蹈稱觴處。雷動山呼萬歲長。  
聖主躬耕在籍田。公卿環衛待豐年。五風十雨餘糧在。金殿惟聞奏舜弦。  
聖日垂科委所司。英才咸喜遇明時。春官進榜鶯離谷。月殿香殘桂魄枝。  
天街香滿瑞雲生。紅繖凝空景日明。先遣五坊排獵騎。爲民除害出神京。  
內宴初開錦繡攢。教坊齊奏萬年歡。簫韶響亮春雲合。日照堯階舞瑞鸞。  
視草詞臣直玉堂。對來新賜錦袍香。班資最在雲霄上。長是先迎日月光。



玉殿朦朧散曉光。金龍高噴九天香。撼鞭聲定初開扇。百辟齊呼萬歲長。  
五色卿雲覆九重。香烟高舞御樓中。含元殿裏行仁德。四海車書已混同。  
欲封丹詔紫泥香。朱篆龍文御印光。汗渙絲綸出丹禁。便從天上鳳銜將。  
越溪姝麗入深宮。儉素皆持馬后風。盡道君王修聖德。不勞辭輦與當熊。  
早梅初向雪中明。風惹奇香粉蕊輕。誰道落花堪饋面。競來枝上采繁英。  
暖殿奇香馥綺羅。窗間初學繡金鵝。纔經冬至陽生後。今日工夫一線多。  
金井澄泉玉液香。瑤璃深殿自清涼。溫湯頭進瓜初熟。後至宮嬪未得嘗。  
繡闥雕甍列錦閨。珍奇惟待鳳凰棲。杏梁烜赫晴霞展。時見空虛墜燕泥。  
龍鳳金鞍軟玉鞭。雪花光照錦連乾。駕頭直指西郊去。曉日寒生講武天。  
憂雲樓上定風盤。雀躍猿跳總不難。要對君王逞輕捷。御樓時擬上雞竿。  
停穩春衫窄地長。通天犀帶綴金章。近臣銜命離丹禁。高捧恩波灑萬方。  
垂黎玉押春簾卷。不夜珠樓曉鑑開。袍袴宮人走迎駕。東風吹送御香來。  
金吾勘契自通官。樓上初聞唱刻閑。金殿香高初喚仗。數行鴛鴦各趨班。  
螺髻凝香曉黛濃。水精鸚鵡颭輕風。金釵斜戴宜春勝。萬歲千秋遠鬢紅。  
縷金團扇對纖絺。正是深宮捧日時。要對君王說幽意。低頭佯念婕妤詩。



結金冠子學梳蟬。碾玉蜻蜓綴鬢偏。寢殿垂簾悄無事。試香閑立御爐前。  
金馬詞臣夜受宣。授毫交直入花磚。白麻草了初呈進。稱旨絲綸下九天。  
平明光政使門開。已見忠臣早入來。自是樞機符造化。大羅天上曜三台。  
紅羅窗裏繡偏慵。顰袖閑隈碧玉籠。蘭殿春晴鸚鵡睡。結條釵飈落花風。  
曉光初入右銀臺。鴛鴦分班啓沃來。如水如魚何際會。盡言金鼎得鹽梅。  
立名金馬近堯階。盡是家傳八斗才。麻尾尙猶龍字溼。便從天上鳳銜來。  
狡狴鎮角舞筵張。鸞鳳花分十六行。輕動玉纖歌遍慢。時時偷眼看君王。  
邊藩開宴賀休征。細仗初排舜日明。坐定兩軍呈百戲。樂臣低折賀昇平。  
碧羅冠子簇香蓮。結勝雙銜利市錢。花下貪忙尋百草。不知遺卻蹙金蟬。  
蘭省初除傅粉郎。靜端霜簡入鴛行。明庭轉制渾無事。朝下空餘雞舌香。  
采訪寧遺草澤人。詔搜無不降蒲輪。集賢殿裏開爐冶。待把黃金鑄重臣。  
紅玉纖纖捧暖笙。絳脣呼吸引春鶯。霓裳曲罷君王笑。宣近前來與改名。  
繡額朱門插艾人。羞將角黍近香脣。平明朝下誇宣賜。五色香絲繫臂新。  
芙蓉冠子水精簪。閑對君王理玉琴。鸞頸鶯脣勝仙子。步虛聲細象窗深。  
金馬門開侍從歸。御香猶惹賜來衣。曉光滿院金魚冷。紅藥花擎宿露飛。



便殿朝回卸玉簪。競來芳檻摘花心。風和難捉花中蝶。卻向窗前弄繡針。  
君王朝下未梳頭。長暈殘眉侍鑑樓。扼臂交光紅玉軟。起來重擬理箜篌。  
九重天上實難知。空遣微臣役夢思。葵藿一心期捧日。強搜狂斐擬宮詞。

楊柳枝

軟碧搖烟似送人。映花時把翠眉嚬。青青自是風流主。慢颭金絲待洛神。  
瑟瑟羅裙金縷腰。黛眉隈破未重描。醉來敲損新花子。拽住仙郎盡放嬌。  
鵲橋初就咽銀河。今夜仙郎自姓和。不是昔年攀桂樹。豈能月裏索姮娥。

洋川

華夷圖上見洋川。知在青山綠水邊。官閑最好遊僧舍。江近應須買釣船。

賈玘

玘字仲寶。晉天福三年進士。宋初官至刑部郎中。

寄贈宣義大師

篆寫千文邁古今。感陶承旨撰碑陰。兩朝雨露書中得。滿篋詩章物外尋。  
衡嶽水雲長挂夢。帝城烟月不關心。西遊去後無消息。想共陳搏一處吟。  
夢英大師詩碑。



